

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय आरण्यकम्

प्रपाठकः 5 - 6

शीक्षा वल्ली
ब्रह्मानन्द वल्ली
भृगु वल्ली
महानारायणोपनिषत्

Version Notes:

This is now the current Version 2.0 dated Sep 30, 2025

1. This replaces the earlier version 1.1 dated July 31, 2022.
2. The corrections found and reported till Sep 30, 2025 are updated.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st Version Number	0.0 dated 18th Jan 2018
2nd Version Number	1.0 dated 31st Mar 2020
3rd Version Number	1.1 dated 31st July 2022

Table of Contents

5 कृष्ण यजुर्वेदीय तैत्तिरीय आरण्यके – पञ्चमः प्रपाठकः.....	8
5.1 पञ्चमः प्रपाठकः – शीक्षा वल्ली	8
अनुवाकं – 1	8
अनुवाकं – 2.....	8
अनुवाकं – 3.....	9
अनुवाकं – 4.....	10
अनुवाकं – 5.....	12
अनुवाकं – 6.....	13
अनुवाकं – 7.....	14
अनुवाकं – 8.....	14
अनुवाकं – 9.....	15
अनुवाकं – 10	16
अनुवाकं – 11.....	16
अनुवाकं – 12	18
ब्रह्मानन्द वल्ली.....	19
अनुवाकं – 13	19
अनुवाकं – 14	19
भृगु वल्ली.....	29
अनुवाकं – 15	29
6 कृष्ण यजुर्वेदीय तैत्तिरीय आरण्यके षष्ठः प्रपाठकः.....	39
6.1 षष्ठः प्रपाठकः – महानारायणोपनिषत्	39
अनुवाकं – 1	39

Special Korvai 51

Special Korvai 51

अनुवाकं – 2.....	52
अनुवाकं – 3.....	53
अनुवाकं – 4.....	53
अनुवाकं – 5.....	53
अनुवाकं – 6.....	54
अनुवाकं – 7.....	54
अनुवाकं – 8.....	54
अनुवाकं – 9.....	55
अनुवाकं – 10	55
अनुवाकं – 11.....	55
अनुवाकं – 12	55
अनुवाकं – 13	58
अनुवाकं – 14	60
अनुवाकं – 15	60
अनुवाकं – 16	61
अनुवाकं – 17	62
अनुवाकं – 18	62
अनुवाकं – 19	62
अनुवाकं – 20.....	62
अनुवाकं – 21	63
अनुवाकं – 22.....	63
अनुवाकं – 23.....	63
अनुवाकं – 24.....	63

अनुवाकं – 25.....	64
अनुवाकं – 26.....	64
अनुवाकं – 27.....	64
अनुवाकं – 28.....	65
अनुवाकं – 29.....	66
अनुवाकं – 30.....	66
अनुवाकं – 31.....	66
अनुवाकं – 32.....	67
अनुवाकं – 33.....	67
अनुवाकं – 34.....	67
अनुवाकं – 35.....	68
अनुवाकं – 36.....	69
अनुवाकं – 37.....	69
अनुवाकं – 38.....	69
अनुवाकं – 39.....	70
अनुवाकं – 40.....	71
अनुवाकं – 41.....	72
अनुवाकं – 42.....	72
अनुवाकं – 43.....	72
अनुवाकं – 44.....	73
अनुवाकं – 45.....	73
अनुवाकं – 46.....	73
अनुवाकं – 47.....	74
अनुवाकं – 48.....	74
अनुवाकं – 49.....	74

अनुवाकं – 50	74
अनुवाकं – 51	75
अनुवाकं – 52	75
अनुवाकं – 53	75
अनुवाकं – 54	75
अनुवाकं – 55	76
अनुवाकं – 56	76
अनुवाकं – 57	76
अनुवाकं – 58	76
अनुवाकं – 59	76
अनुवाकं – 60	77
अनुवाकं – 61	78
अनुवाकं – 62	78
अनुवाकं – 63	78
अनुवाकं – 64	79
अनुवाकं – 65	79
अनुवाकं – 66	80
अनुवाकं – 67	81
अनुवाकं – 68	83
अनुवाकं – 69	83
अनुवाकं – 70	84
अनुवाकं – 71	85
अनुवाकं – 72	85
अनुवाकं – 73	85
अनुवाकं – 74	86
अनुवाकं – 75	86

अनुवाकं – 76.....	86
अनुवाकं – 77.....	86
अनुवाकं – 78.....	87
अनुवाकं – 79.....	88
अनुवाकं – 80.....	92

=====

TAITTIRIYA ARANYAKAM

CHAPTER NUMBER	STARTING MANTRAM AS PER BOOK BY NARASHIMA PRIYA TRUS	STARTING MANTRAM AS PER BOOK FOR WHICH COMMENTARY BY SAYANYACHARYA EDITED BY SHRI HARI NARAYAN APTE (ANANDASHARM SERIES)	STARTING MANTRAM AS PER BOOK FOR WHICH COMMENTARY BY BHATTA BASKARA EDITED BY SHRI MADHAVA SHASTRI	STARTING MANTRAM As Per Grantha books	STARTING MANTRAM AS PER BOOK PUBLISHED BY VEDAVMS.IN
	PUBLISHED DURING 2014	DURING 1898	PUBLISHED DURING 1900	PUBLISHED DURING 1905	DURING 2019 & 2020
1	2	3	4	5	5
TA CHAPTER - 1	भद्रं कर्णेभिः —	भद्रं कर्णेभिः —	भद्रं कर्णेभिः —	भद्रं कर्णेभिः —	भद्रं कर्णेभिः —
TA CHAPTER - 2	सह वै देवानां — — —	सह वै देवानां — — —	सह वै देवानां — — —	सह वै देवानां — — —	सह वै देवानां — — —
TA CHAPTER - 3	चित्तिः सुक् । —	चित्तिः सुक् । —	चित्तिः सुक् । —	चित्तिः सुक् । —	चित्तिः सुक् । —
TA CHAPTER - 4	परेयुवा॒ऽसम् प्रवतो॑ — — —	नमो॑ वा॒चे या — — —	परेयुवा॒ऽसम् प्रवतो॑ — — —	नमो॑ वा॒चे या — — —	परेयुवा॒ऽसम् प्रवतो॑ — — —
TA CHAPTER - 5	शीक्षां व्याख्यास्यामः — Sheeksha valli+ Aanada valli + Brighu valli given together in Chapter 5	देवा वै सत्रमासत । — — —	शीक्षां व्याख्यास्यामः — Sheeksha valli+ Aanada valli + Brighu valli given together in Chapter 5	देवा वै सत्रमासत । — — —	शीक्षां व्याख्यास्यामः — Sheeksha valli+ Aanada valli + Brighu valli given together in Chapter 5
TA CHAPTER - 6	अ॒भस्य॑ पा॒रे भुव॑नस्य — — —	परेयुवा॒ऽसम् प्रवतो॑ — — —	अ॒भस्य॑ पा॒रे भुव॑नस्य — — —	परेयुवा॒ऽसम् प्रवतो॑ — — —	अ॒भस्य॑ पा॒रे भुव॑नस्य — — —
				contd in next page	

TAITTIRIYA ARANYAKAM					
CHAPTER NUMBER	STARTING MANTRAM AS PER BOOK BY NARASHIMA PRIYA TRUST	STARTING MANTRAM AS PER BOOK FOR WHICH COMMENTARY BY SAYANYACHARYA EDITED BY SHRI HARI NARAYAN APTE (ANANDASHARM SERIES)	STARTING MANTRAM AS PER BOOK FOR WHICH COMMENTARY BY BHATTA BASKARA EDITED BY SHRI MADHAVA SHASTRI	STARTING MANTRAM As Per Grantha books	STARTING MANTRAM AS PER BOOK PUBLISHED BY VEDAVMS.IN
	PUBLISHED DURING 2014	DURING 1898	PUBLISHED DURING 1900	PUBLISHED DURING 1905	DURING 2019 & 2020
1	2	3	4	5	5
TA CHAPTER - 7	नमो॑ वा॒चे या	शी॒क्षां व्या॒ख्यास्यामः॑ ।	Books ends at 6th Chapter. "namo vaache" + "devaa vai satramaasata" Chapters not given	शी॒क्षां व्या॒ख्यास्यामः॑ ।	नमो॑ वा॒चे या
TA CHAPTER - 8	दे॒वा वै स॒त्रमा॑सत ।	ब्र॒ह्मवि॒दाप्नो॑ति परं ॥	Books ends at 6th Chapter. "namo vaache" + "devaa vai satramaasata" Chapters not given	ब्र॒ह्मवि॒दाप्नो॑ति परं ॥	दे॒वा वै स॒त्रमा॑सत ।
TA CHAPTER - 9		भृ॒गुर्वै वा॒रुणिः॑ ।		भृ॒गुर्वै वा॒रुणिः॑ ।	
TA CHAPTER -10		अ॒भस्य॑ पा॒रे		अ॒भस्य॑ पा॒रे	

"Vedavms" have followed the order given , as per column 2 above, by "Nrushima Priya Trust".

dated 31st Mar 2020

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

5 कृष्ण यजुर्वेदीय तैत्तिरीय आरण्यके – पञ्चमः प्रपाठकः

5.1 पञ्चमः प्रपाठकः – शीक्षा वल्ली

(See the chart attached after “Table of contents” for the details of “prapaatakam” difference as per different Schools)

अनुवाकं – 1

T.A.5.1.1

शन्नो॑ मि॒त्रः शं॑ व॒रुणः॑ । शन्नो॑ भव॒त्व॒र्य॒मा । शन्न॑ इन्द्रो॑ बृ॒ह॒स्पतिः॑ ।
शन्नो॑ वि॒ष्णु-रु॒रु॒क्रमः॑ । नमो॑ ब्र॒ह्म॒णे । नम॑स्ते वा॒यो ।
त्वमे॒व प्र॒त्यक्षं॑ ब्र॒ह्मा॒सि । त्वमे॒व प्र॒त्यक्षं॑ ब्र॒ह्म वदि॑ष्यामि ।
ऋ॒तं व॑दिष्यामि । स॒त्यं व॑दिष्यामि () । तन्मा॑मवतु । तद्व॒क्तार॑मवतु ।
अवतु॑ मां । अवतु॑ व॒क्तारं॑ ॥ ओं शान्तिः॑ शान्तिः॑ शान्तिः॑ ॥ 1 (15)

(स॒त्यम् व॑दिष्यामि पञ्च॑ च) (A1)

अनुवाकं – 2

T.A.5.2.1

शीक्षां॑ व्या॒ख्यास्या॒मः । वर्णः॑ स्वरः । मात्रा॑ बलं । साम॑ सन्ता॒नः ।
इत्यु॒क्तः शी॒क्षाद्ध्य॒यायः॑ ॥ 2 (5) (शी॒क्षाम् पञ्च॑) (A2)

अनुवाकं – 3

T.A.5.3.1

स॒ह नौ॒ यशः॑ । स॒ह नौ॑ ब्र॒ह्मव॑र्चसं ॥

अथातः स॒ञ्हिता॒या उप॑निषदं व्या॒ख्यास्या॑मः । पञ्च॑स्वधि-क॒रणेषु॑ ।

अधि॑लोक-मधि॑ज्यौतिष-मधि॑विद्य-मधि॑प्रज-मद्ध्य॑ात्मं ।

ता महा॑स॒ञ्हिता इ॒त्याच॑क्षते ॥

अथाधि॑ लो॒कं । पृ॒थि॒वी पूर्॑वरूपं । द्यौरु॑त्तररूपं ।

आका॑शः स॒न्धिः । 3 (10)

T.A.5.3.2

वायुः॑ स॒न्धानं॑ । इत्य॑धि लो॒कं ॥

अथाधि॑ ज्यौतिषं । अ॒ग्निः पूर्॑व रूपं । आ॒दि॒त्य उत्त॑ररूपं ।

आपः॑ स॒न्धिः । वैद्यु॑तः स॒न्धानं॑ । इत्य॑धि ज्यौतिषं ॥

अथाधि॑ विद्यं । आ॒चार्यः पूर्॑व रूपं । 4 (10)

T.A.5.3.3

अन्ते॑वा॒स्युत्त॑ररूपं । वि॒द्या स॒न्धिः ।

प्रव॑चन॒ञ् स॒न्धानं॑ । इत्य॑धि वि॒द्यं ॥

अथाधिप्रजं । माता पूर्वरूपं । पितोत्तररूपं । प्रजा सन्धिः ।
प्रजननं सन्धानं । इत्यधिप्रजं ॥ 5 (10)

T.A.5.3.4

अथाद्ध्यात्मं । अधराहनुः पूर्वरूपं । उत्तराहनु-रुत्तररूपं ।
वाक् सन्धिः । जिह्वा सन्धानं । इत्यद्ध्यात्मं ॥
इती मामहासहिताः ॥

य एवमेता महासहिता व्याख्याता वेद ।

सन्धीयते प्रजया पशुभिः ।

ब्रह्मवर्चसेनान्नाद्येन सुवर्ग्येण (सुवर्गेण) लोकेन () ॥ 6 (10)

(सन्धि - राचार्यः पूर्वरूप - मित्यधिप्रजम् - लोकेन) (A3)

अनुवाकं - 4

T.A.5.4.1

य इच्छन्दसा-मृषभो विश्वरूपः । छन्दोभ्यो-ऽध्यमृताथ् संबभूव ।

स मेन्द्रो मेधया स्पृणोतु । अमृतस्य देव धारणो भूयासं ॥

शरीरं मे विचर्षणं । जिह्वा मे मधुमत्तमा । कर्णाभ्यां भूरि विश्रुवं ।

ब्र॒ह्म॒णः॑ को॒शो॑ऽसि मे॒धया॑ऽपि॒हितः॑ । श्रु॒तं मे॑ गो॒पाय॑ ॥

आ॒व॒ह॒न्ती॑ वि॒त॒न्वा॒ना । 7 (10)

T.A.5.4.2

कु॒र्वा॒णा ची॒र-मा॒त्मनः॑ । वा॒सा॒ऽसि॑ म॒म गा॒वश्च॑ ।

अ॒न्न॒पा॒ने च॑ स॒र्वदा॑ । ततो॑ मे श्रि॒य-मा॒वह॑ ।

लो॒म॒शां प॒शुभिः॑ स॒ह स्वा॒हा ॥ आ॒मा॒य॒न्तु ब्र॒ह्म॒चा॒रि॒णः॑ स्वा॒हा ॥

वि॒मा॒ऽऽय॒न्तु ब्र॒ह्म॒चा॒रि॒णः॑ स्वा॒हा । प्र॒मा॒ऽऽय॒न्तु ब्र॒ह्म॒चा॒रि॒णः॑ स्वा॒हा ।

द॒मा॒य॒न्तु ब्र॒ह्म॒चा॒रि॒णः॑ स्वा॒हा । श॒मा॒य॒न्तु ब्र॒ह्म॒चा॒रि॒णः॑ स्वा॒हा ॥ 8 (10)

T.A.5.4.3

य॒शो ज॒ने॒ऽसा॒नि स्वा॒हा ॥ श्रे॒या॒न् व॒स्य॑सो॒ऽसा॒नि स्वा॒हा ॥

तं त्वा॑ भ॒ग प्र॒वि॒शा॒नि स्वा॒हा । स मा॑ भ॒ग प्र॒वि॒श स्वा॒हा ॥

तस्मि॑न॒त् स॒हस्र॑ शा॒खे । नि॒भ॒गा॒हं त्वयि॑ मृ॒जे स्वा॒हा ॥

यथा॑ऽऽपः प्र॒व॒ता ऽऽय॑न्ति । यथा॑ मा॒सा अ॒हर्ज॑रं ।

ए॒वं मां ब्र॒ह्म॒चा॒रि॒णः॑ । धा॒त॒रा॒य॒न्तु स॒र्वतः॑ स्वा॒हा () ॥

प्र॒ति॒वे॒शो॑ऽसि प्र मा॑ भा॒हि प्र मा॑ प॒द्य॒स्व ॥ 9 (11) (वि॒त॒न्वा॒ना -

श॒मा॒य॒न्तु ब्र॒ह्म॒चा॒रि॒णः॑ स्वा॒हा-धा॒त॒रा॒य॒न्तु स॒र्वतः॑ स्वा॒हैक॑म् च) (A4)

अनुवाकं – 5

T.A.5.5.1

भू-भुव-स्सुव-रिति वा एता स्तिस्रो व्याहतयः ॥
तासामु हस्मै तां चतुर्थीं । माहाचमस्यः प्रवेदयते ।
मह इति ॥ तद् ब्रह्म । स आत्मा । अङ्गान्यन्या देवताः ॥
भूरिति वा अयं लोकः । भुव इत्यन्तरिक्षं ।

सुव-रित्यसौ लोकः । 10 (10)

T.A.5.5.2

मह इत्यादित्यः । आदित्येन वाव सर्वे लोका महीयन्ते ॥
भूरिति वा अग्निः । भुव इति वायुः । सुवरित्यादित्यः ।
मह इति चन्द्रमाः । चन्द्रमसा वाव सर्वाणि ज्योतीषि महीयन्ते ॥
भू-रिति वा ऋचः । भुव इति सामानि ।

सुवरिति यजूषि । 11 (10)

T.A.5.5.3

मह इति ब्रह्म । ब्रह्मणा वाव सर्वे वेदा महीयन्ते ॥
भूरिति वै प्राणः । भुव इत्यपानः । सुवरिति व्यानः । मह इत्यन्नं ।

अ॒न्ने॒न॒ वा॒व॒ स॒र्वे॑ प्रा॒णा॒ म॒ही॒य॒न्ते॑ ॥ ता॒ वा॒ ए॒ता-श्च॑त॒स्रश्च॑तु॒र्द्धा॑ ।

च॒त॒स्र-श्च॑त॒स्रो॒ व्या॒ह॒त॒यः॑ । ता॒ यो वे॑द () । स वे॑द॒ ब्र॒ह्म॑ ।

स॒र्वे॑ऽस्मै॒ दे॒वा॒ ब॒लि॒मा॒व॒ह॒न्ति॑ ॥ 12 (12)

(अ॒सौ॒ लो॒को - यजू॑षि - वे॒द द्वे च॑) (A5)

अनुवाकं - 6

T.A.5.6.1

स॒ य ए॒षोऽन्त॑र्-हृ॒दय॑ आ॒का॒शः॑ । तस्मि॑न्न॒यं पु॒रु॒षो म॒नो॒म॒यः॑ ।

अ॒मृ॒तो हि॒र॒ण्म॒यः॑ ॥ अ॒न्त॒रे॒ण तालु॑के । य ए॒ष स्त॑न इ॒वा॒व॒ल॒म्ब॑ते ।

सै॒न्द्र॒ यो॒निः॑ । य॒त्रा॒सौ के॑शा॒न्तो वि॒व॒र्त॑ते । व्य॒पो॒ह्य शी॒र्ष॒क॒पा॒ले॑ ॥

भू॒रि॒त्य॒ग्नौ प्र॑ति॒ति॒ष्ठ॑ति । भु॒व इति॑ वा॒यौ । 13 (10)

T.A.5.6.2

सु॒व॒रि॒त्यादि॒त्ये॑ । म॒ह इति॑ ब्र॒ह्म॒णि । आ॒प्नो॑ति॒ स्वा॒रा॒ज्यं॑ ।

आ॒प्नो॑ति॒ मन॑स॒स्प॒तिं॑ । वाक्प॑ति॒ श्चक्षु॑ष्प॒तिः॑ । श्रो॑त्र॒पति॑ वि॒ज्ञान॑प॒तिः॑ ।

ए॒तत् ततो॑ भ॒व॒ति॑ । आ॒का॒श॒शरी॑रं ब्र॒ह्म॑ ।

स॒त्या॒त्म प्रा॒णारा॑मं॒ मन॑ आ॒न॒न्दं॑ । शा॒न्ति॑ स॒मृ॒द्ध-म॒मृतं॑ () ॥

इति॑ प्रा॒ची॒नयो॒ग्योपा॑स्व ॥ 14 (11) (वा॒या-व॒मृत॑ मे॒कम् च॑) (A6)

अनुवाकं – 7

T.A.5.7.1

पृ॒थि॒व्यन्त॑रि॒क्षं॑ द्यौर्-दि॒शोऽवा॑न्तरदि॒शाः ।

अ॒ग्निर्-वा॒यु-रा॒दित्य॑-श्च॒न्द्रमा॑ नक्ष॒त्राणि॑ ।

आप॑ ओष॒धयो॑ वन॒स्पतय॑ आका॒श आ॒त्मा । इत्य॑धिभू॒तं ॥

अथा॑द्ध्या॒त्मं । प्रा॒णो व्या॒नोऽपान॑ उ॒दानः॑ स॒मानः॑ ।

चक्षुः॑ श्रो॒त्रं मनो॑ वाक् त्वक् । च॒र्म मा॒स॒स्नावा॑स्थि॒ मज्जा॑ ॥

ए॒त द॑धि॒विधा॒यर्षि॑-र॒वोच॑त् । पा॒ङ्क्तं॑ वा इ॒दं सर्वं॑ () ।

पा॒ङ्क्तं॑ नै॒व पा॒ङ्क्तं॑ स्पृ॒णोती॑ति ॥ 15 (11) (सर्वमेकम् च) (A7)

अनुवाकं – 8

T.A.5.8.1

ओ-मि॒ति ब्र॑ह्म ॥ ओ-मि॒तीदं॑ सर्वं॑ ॥

ओमि॒त्येत॑-दनु॒कृति॑ ह॒स्म वा अ॒प्यो श्रा॑वये॒त्या-श्रा॑वयन्ति ।

ओ-मि॒ति सा॑मा॒नि गा॑यन्ति । ओ॒ शो॑मि॒ति श॒स्त्राणि॑ श॒सन्ति॑ ।

ओ-मि॒त्यद्ध्व॑र्युः प्र॒तिग॑रं प्र॒तिगृ॑णाति । ओ-मि॒ति ब्र॑ह्मा प्र॒सौति॑ ।

ओ-मित्यग्निहोत्र-मनुजानाति ।

ओ-मिति ब्राह्मणः प्रवक्ष्यन्नाह ब्रह्मोपाप्नवानीति ।

ब्रह्मैवो-पाप्नोति ॥ 16 (10) (ओम् दश) (A8)

अनुवाकं - 9

T.A.5.9.1

ऋतं च स्वाध्यायप्रवचने च । सत्यं च स्वाध्यायप्रवचने च ।

तपश्च स्वाध्यायप्रवचने च । दमश्च स्वाध्यायप्रवचने च ।

शमश्च स्वाध्यायप्रवचने च । अग्नयश्च स्वाध्यायप्रवचने च ।

अग्निहोत्रं च स्वाध्यायप्रवचने च ।

अतिथयश्च स्वाध्यायप्रवचने च ।

मानुषं च स्वाध्यायप्रवचने च ।

प्रजा च स्वाध्यायप्रवचने च () ।

प्रजनश्च स्वाध्यायप्रवचने च । प्रजातिश्च स्वाध्यायप्रवचने च ॥

सत्यमिति सत्यवचा रथीतरः ।

तप इति तपोनित्यः पौरुशिष्टिः ।

स्वाद्ध्य॑याय प्रवचने एवेति नाको मौद्ग॒ल्यः ।

तद्धि॑ तपस्तद्धि॑ तपः ॥ 17 (16)

(प्रजा च स्वाद्ध्य॑यायप्रव॑चने च षट्च॑) (A9)

अनुवाकं – 10

T.A.5.10.1

अहं॑ वृक्ष॒स्य रे॒रिवा । की॒र्तिः पृ॒ष्ठं गि॒रेरि॑व ।
ऊ॒र्ध्व प॒वित्रो वा॒जिनी॑व स्व॒मृत॑मस्मि । द्र॒विण॑ꣳ स॒वर्च॑सं ।
सुमे॒धा अ॒मृतो॑क्षितः । इति॑ त्रि॒शङ्को॑र्-वे॒दानु॑वचनं ॥ 18 (6)

(अह॑ꣳ षट्) (A10)

अनुवाकं – 11

T.A.5.11.1

वेदम॑नूच्याऽचा॒र्योन्ते॑वा॒सिन॑-मनु॒शास्ति॑ ॥
सत्यं॑ वद । धर्मं॑ चर ॥ स्वाद्ध्य॑यायान्मा प्रमदः ।
आचा॒र्याय॑ प्रि॒यं धन॑मा॒हत्य॑ प्रजा॒तन्तुं॑ मा व्य॒वच्छे॑त्सीः ।
सत्या॑न्न प्रम॒दित॑व्यं । धर्मा॑न्न प्रम॒दित॑व्यं । कुश॑लान्न प्रम॒दित॑व्यं ।
भूत्यै॑ न प्रम॒दित॑व्यं । स्वाद्ध्य॑यायप्रवचनाभ्यां न प्रम॒दित॑व्यं । 19 (10)

T.A.5.11.2

दे॒वपि॑तृ॒कार्या॑भ्यां न प्र॒मदि॑तव्यं ॥

मा॒तृ॒दे॒वो भव॑ । पि॒तृ॒दे॒वो भव॑ ।

आ॒चा॒र्य॑ दे॒वो भव॑ । अ॒ति॒थि॑दे॒वो भव॑ ॥

या॒न्यन॑व॒द्यानि॑ क॒र्मा॒णि । ता॒नि से॑वि॒तव्या॑नि । नो इ॒तरा॑णि ॥

या॒न्यस्मा॑कꣳ सु॒च॒रि॒ता॒नि । ता॒नि त्वयो॑पा॒स्यानि॑ । 20 (10)

T.A.5.11.3

नो इ॒तरा॑णि ॥ ये के चा॒स्म-च्छ्रे॑याꣳसो ब्रा॒ह्म॒णाः ।

तेषां त्वयाꣳस॒ने न प्र॑श्व॒सित॑व्यं ॥ श्र॒द्धया॑ दे॒यं । अ॒श्रद्ध॑याꣳदे॒यं ।

श्रि॒या दे॒यं । हि॒या दे॒यं । भि॒या दे॒यं । स॒म्वि॑दा दे॒यं ॥

अथ॑ यदि ते क॒र्मवि॑चि॒कि॒त्स्वा वा वृ॑त्त वि॒चि॒कि॒त्स्वा

वा स्या॑त् । 21 (10)

T.A.5.11.4

ये तत्र॑ ब्रा॒ह्म॒णाः स॒मर्॒क्षि॒नः । यु॒क्ता आ॒यु॒क्ताः ।

अ॒लू॒क्षा ध॑र्म॒कामाः॑ स्युः । यथा ते तत्र॑ वर्ते॒रन् । तथा तत्र॑ वर्ते॒थाः ॥

अथाभ्याख्यातेषु । ये तत्र ब्राह्मणाः सम्मर्शि॒नः । युक्ता॑ आयुक्ताः ।
अलूक्षा॑ धर्म॑ कामाः॒ स्युः । यथा ते॑ तेषु॑ वर्ते॑रन् () । 22 (10)

T.A.5.11.5

तथा तेषु॑ वर्ते॑थाः ॥ एष॑ आदेशः । एष॑ उपदेशः । एषा वेदोपनिषत् ।
एतदनुशासनं॑ । एव मुपासितव्यं॑ । एव मुचैतदुपास्यं॑ ॥ 23 (7)

(स्वाद्ध्यायप्रवचनाभ्याम् न प्रमदितव्यम् – तानित्वयोपास्यानि –
स्यात् – तेषु॑ वर्ते॑रन्थ् – +सप्त च) (A11)

अनुवाकं – 12

T.A.5.12.1

शन्नो॑ मि॒त्रः शं॑ वरुणः । शन्नो॑ भवत्व॒र्यमा॑ । शन्न॒ इन्द्रो॑ बृहस्पतिः ।
शन्नो॑ विष्णु॑ रुरुक्रमः । नमो॑ ब्रह्म॒णे । नमस्ते॑ वायो ।
त्वमे॒व प्र॒त्यक्षं॑ ब्रह्मा॒सि । त्वामे॒व प्र॒त्यक्षं॑ ब्रह्मा॒ वादिषं॑ । ऋतम॑वादिषं ।
सत्यम॑वादिषं () । तन्मामा॑वीत् । तद्वक्तारमा॑वीत् । आवी॒न्मां ।
आवी॑द्वक्तारं॑ ॥ ओं शान्तिः॑ शान्तिः॑ शान्तिः॑ ॥ 24 (15)

(सत्यम॑वादिषम् पञ्च च) (A12)

॥ इति शीक्षावल्ली समाप्ता ॥

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

ब्रह्मानन्द वल्ली

अनुवाकं – 13

T.A.5.13.1

स॒ह ना॑ ववतु । स॒ह नौ॑ भुनक्तु । स॒ह वी॒र्यं॑ करवावहै ।

तेज॑स्विना॒ वधी॑तमस्तु॒ मा वि॑द्विषावहै ॥

ओं शान्तिः॑ शान्तिः॑ शान्तिः॑ ॥ 25 (5) (स॒ह पञ्च॑) (A13)

अनुवाकं – 14

T.A.5.14.1

ब्र॒ह्मवि॑दा॒प्नोति॑ परं ॥

तदे॒षाऽभ्यु॑क्ता । स॒त्यं ज्ञा॑न-मनन्तं ब्र॒ह्म ।

यो वेद॑ निहि॒तं गु॑हायां परमे व्योमन् ।

सोऽऽ॒ब्रुते॑ सर्वा॒न् कामा॑न्त् स॒ह । ब्र॒ह्मणा॑ विपश्चि॒तेति॑ ॥

तस्मा॑द्वा ए॒तस्मा॑दात्मन आका॒शः संभू॑तः । आ॒का॒शाद् वा॒युः ।

वा॒योर्ग॒निः । अ॒ग्नेरा॑पः । अ॒द्भ्यः पृ॑थि॒वी । पृ॒थि॒व्या ओष॑धयः ।

ओष॑धी॒भ्योऽन्नं॑ । अन्ना॑त् पु॒रुषः॑ ॥

स वा ए॒ष पु॒रुषोऽन्न॑रसमयः ॥ तस्ये॑दमे॒व शिरः॑ ।

अयं॑ दक्षि॒णः प॒क्षः । अयमु॑त्तरः प॒क्षः । अयमा॑त्मा ॥

इदं॑ पु॒च्छं प्र॒तिष्ठा ॥ तद॑प्येष॒ श्लो॒को भ॒वति ॥ 26 (21)

T.A.5.14.2

अन्ना॑द्वै प्र॒जाः प्र॒जाय॑न्ते । याः काश्च॑ पृथि॒वीऽश्रिताः॑ ।

अथो॑ अन्ने॒नैव जी॑वन्ति । अथै॒नद॑पियन्त्यन्त॒तः ।

अन्न॑ऽ हि भू॒तानां॑ ज्येष्ठं॑ । तस्मा॑त् सर्वो॑षध-मुच्यते ।

सर्वं॑ वै तेऽन्नमा॑प्नुवन्ति । येऽन्नं॑ ब्र॒ह्मोपा॑सते ।

अन्न॑ऽ हि भू॒तानां॑ ज्येष्ठं॑ । तस्मा॑त् सर्वो॑षध-मुच्यते ।

अन्ना॑द् भू॒तानि॑ जायन्ते । जा॒तान्य॑न्नेन वर्द्धन्ते ।

अद्य॑तेऽति च भू॒तानि॑ । तस्मा॑दन्नं तदुच्य॑त इति ॥

तस्मा॑द्वा ए॒तस्मा-द॑न्नरसमयात् ।

अन्योऽन्तर॑ आ॒त्मा प्रा॑णमयः । तेनै॑ष पू॒र्णः ॥

स वा ए॒ष पु॒रुषवि॑ध ए॒व । तस्य॑ पु॒रुषवि॑धतां ।

अ॒न्व॒यं॑ पु॒रु॒ष॒वि॒धः॑ । तस्य॑ प्रा॒ण ए॒व शि॒रः॑ ॥
व्या॒नो दक्षि॑णः प॒क्षः॑ । अ॒पान॑ उत्त॒रः प॒क्षः॑ । आका॑श आ॒त्मा ।
पृ॒थि॒वी पु॒च्छं॑ प्र॒ति॒ष्ठा ॥ तद॒प्येष॑ श्लो॒को भ॒वति॑ ॥ 27 (26)

T.A.5.14.3

प्रा॒णं दे॒वा अ॒नु॒प्रा॒णन्ति॑ । म॒नु॒ष्याः॑ प॒श॒वश्च॑ ये ।
प्रा॒णो हि भू॒ता॒ना॒मायुः॑ । तस्मा॑त् स॒र्वायु॑ष-मु॒च्यते॑ ।
स॒र्वमे॒व त॒ आ॒यु॒र्यन्ति॑ । ये प्रा॒णं ब्र॒ह्मो॒पास॑ते ।
प्रा॒णो हि भू॒ता॒ना॒मायुः॑ । तस्मा॑त् स॒र्वायु॑ष-मु॒च्यत॑ इति ॥
तस्यै॑ष ए॒व शा॒रीर॑ आ॒त्मा । यः पूर्॑व॒स्य ॥
तस्मा॑द्वा ए॒तस्मा॑त् प्रा॒णम॒यात् । अ॒न्योऽन्त॑र आ॒त्मा म॒नोम॑यः ।
तेनै॑ष पू॒र्णः॑ ॥ स॒ वा ए॒ष पु॒रु॒ष॒वि॒ध ए॒व । तस्य॑ पु॒रु॒ष॒वि॒धतां॑ ।
अ॒न्व॒यं पु॒रु॒ष॒वि॒धः॑ । तस्य॑ यजु॒रे॒व शि॒रः॑ । ऋ॒ग् दक्षि॑णः प॒क्षः॑ ।
सा॒मोत्त॑रः प॒क्षः॑ । आ॒देश॑ आ॒त्मा । अथ॑र्वाङ्गि॒रसः॑ पु॒च्छं॑ प्र॒ति॒ष्ठा ॥
तद॒प्येष॑ श्लो॒को भ॒वति॑ ॥ 28 (22)

T.A.5.14.4

यतो॑ वा॒चो॒ नि॒वर्त॑न्ते । अ॒प्रा॒प्य॒ मन॑सा॒ सह॒ । आ॒नन्दं॑ ब्र॒ह्म॒णो वि॒द्वान् ।
 न बि॒भेति॑ कदा॒चने॒ति ॥ तस्यै॑ष ए॒व शा॒रीर आ॒त्मा । यः पूर्॑व॒स्य ॥
 तस्मा॑द्वा ए॒तस्मा॑न् मनो॒मयात् । अ॒न्योऽन्तर॑ आ॒त्मा वि॒ज्ञान॒मयः ।
 तेनै॑ष पूर्णः ॥ स वा ए॒ष पु॒रुष॑वि॒ध ए॒व । तस्य॑ पु॒रुष॑वि॒धतां॑ ।
 अ॒न्वयं॑ पु॒रुष॑वि॒धः । तस्य॑ श्र॒द्धैव॒ शिरः॑ । ऋ॒तं दक्षि॑णः प॒क्षः ।
 सत्य॑मु॒त्तरः॑ प॒क्षः । यो॒ग आ॒त्मा ।

महः॑ पु॒च्छं प्र॒तिष्ठा ॥ तद॑प्येष॒ श्लो॒को भ॒वति ॥ 29 (18)

T.A.5.14.5

वि॒ज्ञानं॑ य॒ज्ञं त॑नु॒ते । कर्मा॑णि त॒नुतेऽपि॑ च । वि॒ज्ञानं॑ दे॒वाः सर्वे॑ ।
 ब्र॒ह्म ज्येष्ठ॑-मुपा॒सते॑ । वि॒ज्ञानं॑ ब्र॒ह्म चेद् वेद॑ । तस्मा॑च्चे॒न्न प्र॒माद्य॑ति ।
 शरी॑रे पा॒प्मनो॑ हि॒त्वा । सर्वा॑न्-का॒मान्-सम॑श्नु॒त इति॑ ॥
 तस्यै॑ष ए॒व शा॒रीर आ॒त्मा । यः पूर्॑व॒स्य ॥
 तस्मा॑द्वा ए॒तस्मा॑द्-वि॒ज्ञान॒मयात् । अ॒न्योऽन्तर॑ आ॒त्माऽऽन॑न्द॒मयः॑ ।
 तेनै॑ष पूर्णः ॥ स वा ए॒ष पु॒रुष॑वि॒ध ए॒व । तस्य॑ पु॒रुष॑वि॒धतां॑ ।
 अ॒न्वयं॑ पु॒रुष॑वि॒धः । तस्य॑ प्रि॒य-मे॒व शिरः॑ । मो॒दो दक्षि॑णः प॒क्षः ।

प्र॒मोद॑ उत्त॒रः प॒क्षः । आ॒नन्द॑ आ॒त्मा । ब्र॒ह्म पु॒च्छं प्र॒तिष्ठा ॥

तद॒प्येष॑ श्लो॒को भ॒वति ॥ 30 (22)

T.A.5.14.6

अस॒न्ने॒व स॑ भ॒वति॑ । अस॒द् ब्र॒ह्मेति॑ वे॒द चेत् ।

अस्ति॑ ब्र॒ह्मेति॑ चेद् वे॒द । स॒न्तमे॑नं॒ ततो॑ वि॒दुरि॑ति ॥

तस्यै॑ष ए॒व शा॒रीर॑ आ॒त्मा । यः पूर्॒वस्य॑ ॥ अथातो॑ऽनु प्र॒श्नाः ॥

उ॒ता वि॒द्वा न॒मुं लो॒कं प्रे॒त्य । कश्च॑न ग॒च्छती॑(3) ।

आ॒हो वि॒द्वान॒मुं लो॒कं प्रे॒त्य ।

कश्चित्॑ स॒मश्नु॑ता(3) उ ॥ सोऽका॑मयत ।

ब॒हुस्यां॑ प्र॒जाये॑येति । स तपो॑ऽतप्यत । स तप॑स्तप्त्वा ।

इ॒दं सर्व॑-म॒सृज॑त ॥ य॒दिदं॑ किञ्च । तथ्सृ॑ष्ट्वा । तदे॒वानु॑ प्रा॒विश॑त् ॥

तद॒नुप्र॑विश्य । स॒च्च त्य॑च्चा॒भव॑त् । नि॒रुक्तं॑ चा॒निरुक्तं॑ च ।

नि॒लय॑नं चा॒निल॑यनं च । वि॒ज्ञानं॑ चा॒विज्ञा॑नं च ।

स॒त्यं चा॒नृतं॑ च स॒त्य-म॒भव॑त् ॥ य॒दिदं॑ किञ्च ।

तथ्स॒त्य-मि॑त्या च॒क्षते॑ ॥ तद॒प्येष॑ श्लो॒को भ॒वति ॥ 31 (28)

T.A.5.14.7

अस॒द्वा इ॒दम॒ग्र आ॒सीत् । ततो॒ वै स॒दजा॒यत ।
तदा॒त्मान॑ ७ स्वय॑-मकु॒रुत । तस्मा॑त् तथ् सु॒कृत॑मुच्यत इति ॥
यद्वै तथ् सु॒कृतं । रसो॒ वै सः ।
रस॑ ७ ह्येवा॒यं ल॑ब्ध्वाऽऽन॒न्दी भ॒वति ॥
को ह्येवा॒न्यात् कः प्रा॒ण्यात् । यदेष॑ आका॒श आ॒नन्दो॑ न स्यात् ।
एष॑ ह्येवा॒नन्द॑याति ॥
यदा॒ ह्येवै॒ष एत॑स्मिन्-नदृ॒श्ये ऽना॑त्म्ये ऽनि॒रुक्ते ऽनि॒लयने॑ ऽभयं
प्रति॑ष्ठां वि॒न्दते ।
अथ॑ सोऽभयं गतो भ॒वति ॥
यदा॒ ह्येवै॒ष एत॑स्मिन्-नुदर॑-मन्तरं कु॒रुते । अथ॑ तस्य॑ भयं भ॒वति ॥
तत्त्वे॒व भयं॑ वि॒दुषो॑-ऽम॒न्वान॒स्य ॥ तद॑प्येष॑ श्लो॒को भ॒वति ॥ 32 (16)

T.A.5.14.8

भी॒षाऽस्मा॑-द्वातः॑ पवते । भी॒षोदे॑ति सूर्यः॑ ।
भी॒षाऽस्मा॑-दग्नि॑-श्चेन्द्र॒श्च । मृ॒त्युर् धा॑वति पञ्च॒म इति ॥
सै॒षाऽऽन॑न्दस्य मीमा॒न्सा भ॒वति ॥ यु॒वा स्या॑त् साधु॒युवा॑ऽद्ध्या॒यकः॑ ।

आशि॑ष्ठो दृ॒ढिष्ठो॑ ब॒लिष्ठः॑ । तस्ये॑यं पृथि॒वी सर्वा॑ वि॒त्तस्य॑ पूर्णा॒ स्यात् ।
स ए॒को मानु॑ष आ॒नन्दः॑ ॥ ते ये श॑तं मानु॑षा आ॒नन्दाः॑ । 33.a (10)

स ए॒को मनु॑ष्यगन्ध॒र्वाणा-मा॒नन्दः॑ । श्रोत्रि॑यस्य चा॒काम॑ह॒तस्य॑ ॥
ते ये श॑तं मनु॑ष्यगन्ध॒र्वाणा-मा॒नन्दाः॑ ।

स ए॒को दे॒वगन्ध॒र्वाणा-मा॒नन्दः॑ । श्रोत्रि॑यस्य चा॒काम॑ह॒तस्य॑ ॥
ते ये श॑तं दे॒वगन्ध॒र्वाणा-मा॒नन्दाः॑ ।

स ए॒कः पि॒तृणां॑चि॒रलोक॑-लो॒काना॑-मा॒नन्दः॑ ।
श्रोत्रि॑यस्य चा॒काम॑ह॒तस्य॑ ॥

ते ये श॑तं पि॒तृणां॑चि॒रलोक॑-लो॒काना॑-मा॒नन्दाः॑ ।
स ए॒क आ॒जान॑जानां दे॒वाना॑-मा॒नन्दः॑ । 33.b (10)

श्रोत्रि॑यस्य चा॒काम॑ह॒तस्य॑ ॥
ते ये श॑त-मा॒जान॑-जा॒नां दे॒वाना॑-मा॒नन्दाः॑ ।
स ए॒कः क॒र्मदे॒वानां॑ दे॒वाना॑-मा॒नन्दः॑ ।
ये क॒र्मणा॑ दे॒वानपि॑ य॒न्ति । श्रोत्रि॑यस्य चा॒काम॑ह॒तस्य॑ ॥

ते ये शतं कर्मदेवानां देवाना-मानन्दाः । स एको देवाना-मानन्दः ।

श्रोत्रियस्य चाकामहतस्य ॥ ते ये शतं देवाना-मानन्दाः ।

स एक इन्द्रस्यानन्दः । 33.c (10)

श्रोत्रियस्य चाकामहतस्य ॥ ते ये शतमिन्द्रस्याऽऽनन्दाः ।

स एको बृहस्पते-रानन्दः । श्रोत्रियस्य चाकामहतस्य ॥

ते ये शतं बृहस्पते रानन्दाः । स एकः प्रजापते-रानन्दः ।

श्रोत्रियस्य चाकामहतस्य ॥ ते ये शतं प्रजापते-रानन्दाः ।

स एको ब्रह्मण आनन्दः । श्रोत्रियस्य चाकामहतस्य ॥ 33.d (10)

स यश्चायं पुरुषे । यश्चासा-वादित्ये । स एकः ॥ स य एवं वित् ।

अस्माल्लोकात् प्रेत्य । एतमन्नमयमात्मान-मुपसङ्क्रामति ।

एतं प्राणमयमात्मान-मुपसङ्क्रामति ।

एतं मनोमयमात्मान-मुपसङ्क्रामति ।

एतं विज्ञानमयमात्मान-मुपसङ्क्रामति ।

ए॒त॒मा॒न॒न्द॒म॒य॒मा॒त्मा॒न-मु॒प॒स॒ङ्क्रा॒म॒ति ॥

तद॒प्येष॑ श॒लो॒को भ॒व॒ति ॥ 33.e (11)

T.A.5.14.9

य॒तो वा॒चो॒ नि॒व॒र्त॒न्ते । अ॒प्रा॒प्य॒ म॒न॒सा॒ स॒ह । आ॒न॒न्दं॑ ब्र॒ह्म॒णो वि॒द्वान् ।

न बि॒भेति॑ कु॒तश्च॑ने॒ति ॥ ए॒त॒ ह वा॑ व॒ न त॒प॒ति ।

कि॒म॒ह॒ सा॒धु॒ ना॒क॒र॒वं । कि॒म॒हं पा॒प-म॒क॒र॒व-मि॒ति ॥

स॒ य ए॒वं वि॒द्वाने॑ते आ॒त्मा॒न॒ स्पृ॒णु॒ते ॥

उ॒भे ह्ये॒वैष॑ ए॒ते आ॒त्मा॒न॒ स्पृ॒णु॒ते ।

य ए॒वं वै॒द ॥ इ॒त्यु॒प॒नि॒षत् ॥ 34 (11)

स॒ह ना॑ व॒व॒तु । स॒ह नौ॑ भु॒न॒क्तु । स॒ह वी॒र्यं॑ क॒र॒वा॒व॒है ।

ते॒ज॒स्वि॒ना व॒धी॑त॒म॒स्तु॒ मा वि॒द्विषा॒व॒है ॥ ओं॑ शा॒न्तिः॒ शा॒न्तिः॒ शा॒न्तिः॑ ॥

=====

(ब्रह्मविदिदमयमिदमेकविंशतिः / – T.A.5.14.1

अन्नादन्नरसमयात् प्राणो व्यानोऽपान आकाशः पृथिवी पुच्छं
षड्विंशतिः / – T.A.5.14.2

प्राणम् प्राणमयान् मनो यजुर्ऋक् सामादेशोऽथर्वाङ्गिरसः पुच्छम्
द्वाविंशतिः / – T.A.5.14.3

यतः श्रद्धर्तु सत्यम् यौगो महोऽष्टादश / – T.A.5.14.4

विज्ञानम् प्रियम् मोदः प्रमोद आनन्दो ब्रह्म पुच्छम् द्वाविंशतिः / – T.A.5.14.5

असन्नेवाथाष्टाविंशतिः / – T.A.5.14.6

असथ् षोडश / – T.A.5.14.7

भीषाऽस्मान् मानुषो मनुष्यगन्धर्वाणाम् देवगन्धर्वाणाम् पितृणाम्चिरलोकलोकानां
माजानजानाम् कर्मदेवानाम् ये कर्मणा देवानामिन्द्रस्य बृहस्पतेः प्रजापतेर्
ब्रह्मणः स यश्च संक्रामत्येकपञ्चाशत् / – T.A.5.14.8

यतः कुतश्च नैतमेकादश नव) – T.A.5.14.9 (A14)

इति ब्रह्मानन्दवल्ली समाप्ता

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

भृगु वल्ली

स॒ह ना॑ ववतु । स॒ह नौ॑ भुनक्तु । स॒ह वी॒र्यं॑ करवावहै ।

तेज॒स्विना॑ वधी॒तमस्तु॑ मा वि॒द्विषा॑वहै ॥

ओं शान्तिः॑ शान्तिः॑ शान्तिः॑ ॥

अनुवाकं - 15

T.A.5.15.1

भृ॒गुर्वै वा॒रुणिः॑ । वरु॒णं पि॒तर॑-मु॒पस॑सार । अधी॑हि भगवो ब्रह्मेति॑ ॥

तस्मा॑ ए॒तत् प्रो॑वाच । अन्नं॑ प्रा॒णं चक्षुः॑ श्रो॒त्रं मनो॑ वाचमिति॑ ॥

त॒प् हो॑वाच । यतो॑ वा इ॒मानि॑ भू॒तानि॑ जायन्ते ।

येन॑ जा॒तानि॑ जीवन्ति । यत् प्रय॑न्त्यभि॒ सम्वि॑शन्ति ।

तद् विजि॑ज्ञासस्व । तद् ब्रह्मेति॑ ॥

स तपो॑ऽतप्यत । स तप॑-स्तप्त्वा ॥ 35 (13)

T.A.5.15.2

अ॒न्नं ब्र॒ह्मेति॑ व्य॒जानात् । अ॒न्नाद्ध्ये॑व ख॒ल्विमा॒नि भू॒तानि॑ जा॒यन्ते ।
 अ॒न्नेन॑ जा॒तानि॑ जी॒वन्ति । अ॒न्नं प्र॑य॒न्त्यभि॑-स॒म्विश॑न्तीति ॥
 तद् वि॒ज्ञाय॑ । पु॒नरे॒व वरु॑णं पि॒तर॑-मु॒पस॑सार ।
 अधी॑हि भ॒गवो ब्र॒ह्मेति॑ । त॒ऽहो॑वाच । त॒पसा॒ ब्रह्म॑ वि॒जिज्ञा॑सस्व ।
 तपो॑ ब्र॒ह्मेति॑ । स तपो॑ऽत॒प्यत । स तप॑-स्त॒प्त्वा ॥ 36 (12)

T.A.5.15.3

प्रा॒णो ब्र॒ह्मेति॑ व्य॒जानात् ।
 प्रा॒णाद्ध्ये॑व ख॒ल्विमा॒नि भू॒तानि॑ जा॒यन्ते । प्रा॒णेन॑ जा॒तानि॑ जी॒वन्ति ।
 प्रा॒णं प्र॑य॒न्त्यभि॑-स॒म्विश॑न्तीति ॥ तद् वि॒ज्ञाय॑ ।
 पु॒नरे॒व वरु॑णं पि॒तर॑-मु॒पस॑सार । अधी॑हि भ॒गवो ब्र॒ह्मेति॑ ।
 त॒ऽहो॑वाच । त॒पसा॒ ब्रह्म॑ वि॒जिज्ञा॑सस्व । तपो॑ ब्र॒ह्मेति॑ ।
 स तपो॑ऽत॒प्यत । स तप॑-स्त॒प्त्वा ॥ 37 (12)

T.A.5.15.4

म॒नो ब्र॒ह्मेति॑ व्य॒जानात् । म॒नसो॑ ह्ये॒व ख॒ल्विमा॒नि भू॒तानि॑ जा॒यन्ते ।
 म॒नसा॑ जा॒तानि॑ जी॒वन्ति । म॒नः प्र॑य॒न्त्यभि॑-स॒म्विश॑न्तीति ॥

तद् वि॒ज्ञाय॑ । पुन॑रेव वरुणं॑ पि॒तर-मु॑पससार ।
 अधी॑हि भगवो ब्रह्मेति॑ । त॒प् हो॑वाच । तप॑सा ब्रह्म विजि॑ज्ञासस्व ।
 तपो॑ ब्रह्मेति॑ । स तपो॑ऽतप्यत । स तप॑-स्तप्त्वा ॥ 38 (12)

T.A.5.15.5

वि॒ज्ञानं॑ ब्रह्मेति॑ व्य॒जानात् ।
 वि॒ज्ञाना-द॑ध्येव खल्वि॒मानि॑ भू॒तानि॑ जायन्ते ।
 वि॒ज्ञानेन॑ जा॒तानि॑ जीवन्ति । वि॒ज्ञानं॑ प्रय॑न्त्यभि-सम्वि॑शन्तीति॑ ॥
 तद् वि॒ज्ञाय॑ । पुन॑रेव वरुणं॑ पि॒तर-मु॑पससार ।
 अधी॑हि भगवो ब्रह्मेति॑ । त॒प् हो॑वाच । तप॑सा ब्रह्म विजि॑ज्ञासस्व ।
 तपो॑ ब्रह्मेति॑ । स तपो॑ऽतप्यत । स तप॑-स्तप्त्वा ॥ 39 (12)

T.A.5.15.6

आ॒नन्दो॑ ब्रह्मेति॑ व्य॒जानात् ।
 आ॒नन्दा-द॑ध्येव-खल्वि॒मानि॑ भू॒तानि॑ जायन्ते ।
 आ॒नन्देन॑ जा॒तानि॑ जीवन्ति । आ॒नन्दं॑ प्रय॑न्त्यभि-सम्वि॑शन्तीति॑ ॥
 सै॒षा भा॑र्गवी वा॒रुणी॑ वि॒द्या । प॒रमे॑ व्यो॒मन् प्र॑तिष्ठिता ॥
 य ए॒वं वैद॑ प्र॒तिति॑ष्ठति । अ॒न्नवा॑नन्नादो भवति ।

म॒हान् भ॑वति प्र॒जया॑ प॒शुभिर् ब्र॑ह्मवर्च॒सेन॑ ।

म॒हान् की॒र्त्या ॥ 40 (10)

T.A.5.15.7

अ॒न्नं न नि॒न्द्यात् । तद् व्र॒तं ॥ प्रा॒णो वा अ॒न्नं॑ । शरी॑रमन्नादं ।

प्रा॒णो शरी॑रं प्रति॒ष्ठितं॑ । शरी॑रे प्रा॒णः प्रति॑ष्ठितः ।

तदे॒त-द॒न्न-म॒न्ने प्रति॑ष्ठितं ॥

स य ए॒त-द॒न्न-म॒न्ने प्रति॑ष्ठितं ँवे॒द प्रति॑तिष्ठति ।

अ॒न्नवा-न॒न्नादो॑ भवति ।

म॒हान् भ॑वति प्र॒जया॑ प॒शुभिर्-ब्र॑ह्मवर्च॒सेन॑ ।

म॒हान् की॒र्त्या ॥ 41 (11)

T.A.5.15.8

अ॒न्नं न परि॑चक्षीत । तद् व्र॒तं । आ॒पो वा अ॒न्नं॑ । ज्योति॑रन्नादं ।

अ॒प्सु ज्योतिः॑ प्रति॒ष्ठितं॑ । ज्योति॑ष्यापः प्रति॒ष्ठिताः॑ ।

तदे॒त-द॒न्न-म॒न्ने प्रति॑ष्ठितं ॥

स य ए॒त-द॒न्न-म॒न्ने प्रति॑ष्ठितं ँवे॒द प्रति॑तिष्ठति ।

अ॒न्न॒वा-न॒न्ना॒दो भ॑वति । म॒हान् भ॑वति प्र॒जया॑ प॒शुभि॑र् ब्र॒ह्मव॑र्च॒सेन॑ ।

म॒हान् की॒र्त्या ॥ 42 (11)

T.A.5.15.9

अ॒न्नं ब॒हु कु॑र्वीत । तद् व्र॒तं ॥ पृ॒थि॒वी वा अ॒न्नं । आ॒का॒शोऽ॒न्नादः॑ ॥

पृ॒थि॒व्या-मा॒का॒शः प्र॑ति॒ष्ठितः॑ । आ॒का॒शे पृ॑थि॒वी प्र॑ति॒ष्ठिता ।

तदे॒त-द॒न्न-म॒न्त्रे प्र॑ति॒ष्ठितं॑ ॥

स य ए॒त-द॒न्न-म॒न्त्रे प्र॑ति॒ष्ठितं॑ ँ॒वेद॑ प्र॒ति॒तिष्ठ॑ति ।

अ॒न्न॒वा॒न॒न्ना॒दो भ॑वति । म॒हान् भ॑वति प्र॒जया॑ प॒शुभि॑र् ब्र॒ह्मव॑र्च॒सेन॑ ।

म॒हान् की॒र्त्या ॥ 43 (11)

T.A.5.15.10

न कञ्च॑न वस॒तौ प्र॑त्याचक्षी॒त । तद् व्र॒तं ॥

तस्मा॑द्यया कया च वि॒धया॑ ब॒ह्वन्नं॑ प्राप्नुयात् ॥

अ॒रा॒द्ध्य॑स्मा अ॒न्नमि॑त्याचक्ष॒ते ॥ ए॒तद्वै मु॒खतोऽ॒न्नञ् रा॒द्धं ।

मु॒खतोऽ॒स्मा अ॒न्नञ् रा॒द्ध्य॑ते । ए॒तद्वै म॒द्ध्यतोऽ॒न्नञ् रा॒द्धं ।

म॒द्ध्यतोऽ॒स्मा अ॒न्नञ् रा॒द्ध्य॑ते । ए॒तद्वै अ॒न्ततोऽ॒न्नञ् रा॒द्धं ।

अ॒न्ततोऽ॒स्मा अ॒न्नञ् रा॒द्ध्य॑ते । 44.a (10)

य॑ ए॒वं वे॒द ॥ क्षे॒म इति॑ वा॒चि । यो॒गक्षे॒म इति॑ प्रा॒णापा॒नयोः॑ ।
 क॒र्मेति॑ ह॒स्तयोः॑ । ग॒ति-रिति॑ पा॒दयोः॑ । वि॒मुक्ति॑-रिति॑ पा॒यौ ।
 इति॑ मा॒नुषीः॑ स॒माज्ञाः॑ ॥ अथ॑ दै॒वीः । तृ॒प्ति-रिति॑ वृ॒ष्टौ ।
 ब॒ल-मिति॑ वि॒द्युति॑ । 44.b (10)

यश॑ इति॑ प॒शुषु॑ । ज्योति॑रिति॑ नक्ष॒त्रेषु॑ ।
 प्रजा॑ति-र॒मृत॑-मा॒नन्द॑ इत्यु॒पस्थे॑ । स॒र्व मि॒त्याका॒शे ॥
 तत् प्र॑ति॒ष्ठे-त्यु॑पासी॒त । प्र॑ति॒ष्ठावा॑न् भ॒वति॑ । तन्म॑ह इत्यु॒पासी॒त ।
 म॑हा॒न् भ॒वति॑ । तन्म॑न इत्यु॒पासी॒त । मा॑न॒वान् भ॒वति॑ । 44.c (10)

तन्न॑म इत्यु॒पासी॒त । न॒म्यन्ते॑ऽस्मै का॒माः । तद्ब्र॑ह्मे-त्यु॒पासी॒त ।
 ब्र॑ह्म॒वान् भ॒वति॑ । तद् ब्र॑ह्म॒णः प॑रि॒मर॑ इत्यु॒पासी॒त ।
 प॑र्ये॒णं म्रि॑यन्ते॒ द्विष॑न्तः स॒पत्नाः॑ । प॑रि॒ येऽप्रि॑या॒ भ्रातृ॑व्याः ॥
 स यश्चा॑यं पु॒रुषे॑ । यश्चा॑सा-वादि॒त्ये । स ए॒कः । 44.d (10)

स य एवं॑ वित् । अस्माल्लो॑कात् प्रेत्य ।

एतमन्नमय-मात्मान-मुपसङ्क्रम्य ।

एतं प्राणमय-मात्मान-मुपसङ्क्रम्य ।

एतं मनोमय-मात्मान-मुपसङ्क्रम्य ।

एतं विज्ञानमय-मात्मान-मुपसङ्क्रम्य ।

एत मानन्दमय-मात्मान-मुपसङ्क्रम्य ।

इमान् लोकान् कामा॑न्नी कामरूप्यनुसञ्चरन् ।

एतथ् सामगायन्नास्ते ॥ हा(३) वु हा(३) वु हा(३) वु । 44.e (10)

अह-मन्न-मह-मन्न-महमन्नं ।

अहमन्नादो(२)ऽहमन्नादो(२) ऽहमन्नादः ।

अह७ श्लोककृ-दह७ श्लोककृ-दह७ श्लोककृत् ।

अहमस्मि प्रथमजा ऋता(३)स्य ।

पूर्वं देवेभ्यो अमृतस्य ना(३) भा इ ।

यो मा ददाति स इदेव मा(३)वाः ।

अ॒ह-म॒न्न-म॒न्न-म॒दन्त॒-मा(३)॒ धि ।

अ॒हं वि॒श्वं भु॒वन॒-म॒भ्यभ॒वां । सु॒वर्न॒ ज्योतीः॑ ॥

य ए॒वं वै॒द ॥ इ॒त्युप॒निषत् ॥ 44.f (11)

स॒ह ना॑ ववतु । स॒ह नौ॑ भुनक्तु । स॒ह वी॒र्यं॑ करवावहै ।

ते॒ज॒स्विना॒ वधी॑तमस्तु मा वि॒द्विषा॒वहै॑ ॥

ओं शान्तिः॑ शान्तिः॑ शान्तिः॑ ॥

(भृ॒गुस्तस्मै॑ यतो॑ वि॒शन्ति॑ तद् वि॒जिज्ञा॑सस्व त्रयो॑दशान्नं प्रा॒णो मनो॑
वि॒ज्ञान॑मिति वि॒ज्ञाय॑ तन्तपसा द्वाद॑श द्वाद॑शान्नन्द इति सैषा दशान्नं न
नि॒न्द्यात् प्रा॒णाः शरी॑रमन्नं न परि॑चक्षीतापो ज्योति॑रन्नं बहु॑कुर्वीत
पृथि॑व्याका॒श एका॑दशैकाद॒श न कञ्च॑नैकषष्टि॑र् द॒श)

or

(भृ॒गुस्त्रयो॑द॒शा - न्नम् - प्रा॒णो - मनो॑ - वि॒ज्ञान॑म् द्वाद॑श द्वाद॑शा
- नन्दो॑ द॒शा - न्नम् न नि॒न्द्या - दन्नम् न परि॑चक्षीता -
न्नम् बहु॑कुर्वि तैका॑दशैकाद॒श - न कञ्च॑ नैकषष्टि॑र्द॒श) (A15)

इति भृगुवल्ली समाप्ता

Prapaataka Korvai with starting Padams of 1 to 15 Anuvaakams :-

(शम् नः - शीक्षा - सह नौ - य इच्छन्दसाम् - भूः -
स यः - पृथि - व्योमि - त्वृतम् चा - हम् - वैदमनूच्य -
शम् नः - सह नाववतु - ब्रह्मविद् - भृगुः पञ्चदश)

Korvai with starting Padams of 1, 11, 21 Series of Dasinis :-

(शम् नो - मह इत्यादित्यो - नो इतराण्य - सन्नेवा -
न्नम् न निन्द्याच्चतुश्चत्वारिंशत्)

First and Last Padam in TA, 5th Prapaatakam :-

(शन्न - इत्युपनिषत्)

॥ हरिः ओम् ॥

॥ कृष्ण यजुर्वेदीय तैत्तिरीय ब्राह्मणे आरण्यके पञ्चमः प्रपाठकः समाप्तः ॥

Details of Dasini&Vaakyams for Prapaatakam5 (TA 5)

	Dasini	Vaakyams
Anuvakam 1	1	15
Anuvakam 2	1	5
Anuvakam 3	4	40
Anuvakam 4	3	31
Anuvakam5	3	32
Anuvakam6	2	21
Anuvakam7	1	11
Anuvakam8	1	10
Anuvakam9	1	16
Anuvakam 10	1	6
Anuvakam 11	5	47
Anuvakam 12	1	15
Anuvakam 13	1	5
Anuvakam 14	9	215
Anuvakam 15	10	165
Total →	44	634

<u>Total as per</u> <u>grantha books</u> anuvaakam 15	44	
---	----	--

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

6 कृष्ण यजुर्वेदीय तैत्तिरीय आरण्यके षष्ठः प्रपाठकः

6.1 षष्ठः प्रपाठकः – महानारायणोपनिषत्

स॒ह ना॑ ववतु । स॒ह नौ॑ भुनक्तु । स॒ह वी॒र्यं॑ करवावहै ।

तेज॑स्विना॒ वधी॑तमस्तु॒ मा वि॑द्विषावहै ॥

ओं शान्तिः॑ शान्तिः॑ शान्तिः॑ ॥

अनुवाकं – 1

T.A.6.1.1

अ॒ंभस्य॑ पा॒रे भु॒वनस्य॑ म॒ध्ये ना॒कस्य॑ पृ॒ष्ठे म॒हतो॑ म॒हीयान्॑ ।

शु॒क्रेण॑ ज्योती॑ष्णि॒ समनु॑प्रविष्टः प्र॒जाप॑तिश्चरति गर्भे॑ अ॒न्तः ॥

यस्मि॑न्निदं स॒ञ्च वि॒चैति॑ सर्वं यस्मि॑न् दे॒वा अधि॑ विश्वे॑ निषेदुः ।

तदे॒व भू॒तं तदु॑ भव्यमा इ॒दं तद॑क्षरे॒ परमे॑ व्योमन् ॥

येनाऽऽवृ॑तं खञ्च॒ दिवं॑ म॒हीञ्च॒ येनादि॑त्य-स्तपति॒ तेजसा॑

भ्राज॑सा च ।

यम॑न्तः स॒मुद्रे॑ क॒वयो॑ वयन्ति॒ यद॑क्षरे॒ परमे॑ प्र॒जाः ॥

यतः प्रसूता जगतः प्रसूती तोयेन जीवान् व्यचसर्ज भूम्यां ।
यदोषधीभिः पुरुषान् पशूँश्च विवेश भूतानि चराचराणि ॥
अतः परं नान्य-दणीयसञ्हि परात् परं यन् महतो महान्तं ।
यदेक-मव्यक्त-मनन्तरूपं विश्वं पुराणं तमसः परस्तात् ॥ 1 (10)

T.A.6.1.2

तदेवर्तं तदु सत्यमाहु-स्तदेव ब्रह्म परमं कवीनां ।
इष्टापूर्तं बहुधा जातं जायमानं विश्वं बिभर्ति भुवनस्य नाभिः ॥
तदेवाग्नि-स्तद्वायु-स्तत्सूर्यस्तदु चन्द्रमाः ।
तदेव शुक्रममृतं तद्ब्रह्म तदापः स प्रजापतिः ॥
सर्वे निमेषा जज्ञिरे विद्युतः पुरुषादधि ।
कला मुहूर्त्ताः काष्ठाश्चाहो-रात्राश्च सर्वशः ॥
अर्द्धमासा मासा ऋतवः सम्वत्सरश्च कल्पन्तां ।
स आपः प्रदुधे उभे इमे अन्तरिक्ष-मथो सुवः ॥
नैन-मूर्द्ध्वं न तिर्यं च न मध्ये परिजग्रभत् ।
न तस्येशे कश्चन तस्य नाम महद्यशः ॥ 2 (10)

T.A.6.1.3

न स॒न्दृ॒शे तिष्ठति॑ रू॒पम॑स्य न चक्षु॑षा पश्यति॑ कश्चनै॑नं ।
हृ॒दा म॑नीषा म॒नसाऽभि॑ क्लृ॒प्तो य ए॑नं वि॒दु-र॑मृ॒तास्ते भ॑वन्ति ॥

Expansion of अद्भ्यः संभूतः : (Appearing in T.A.3.13.1)

अद्भ्यः॑ संभू॑तः पृ॒थिव्यै॑ रसाच्च॑ । वि॒श्वक॑र्मणः॒ सम॑वर्तताधि॑ ।
तस्य॑ त्वष्टा॑ वि॒दध॑द्रूपमेति॑ ॥
तत्पु॑रुषस्य॒ विश्व॑मा॒जान॑मग्रै॑ । वे॒दाह॑मेतं पु॒रुषं॑ म॒हान्तं॑ ॥
आ॒दित्य॑ वर्णं॒ तम॑सः॒ पर॑स्तात् ।
तमे॒वं वि॒द्वान॑मृत॒ इह॑ भवति॑ । नान्यः॑ पन्था॑ विद्यतेऽय॑नाय ॥
प्र॒जाप॑तिश्चरति॒ गर्भे॑ अ॒न्तः । अ॒जाय॑मानो बहु॒धा वि॒जाय॑ते ।
तस्य॑ धीराः॒ परि॑जानन्ति॒ योनिं॑ । मरी॑चीनां प॒दमि॑च्छन्ति वे॒धसः॑ ॥
यो दे॒वेभ्य॑ आ॒तप॑ति । यो दे॒वानां॑ पु॒रोहि॑तः ।
पूर्वो॑ यो दे॒वेभ्यो॑ जा॒तः । नमो॑ रु॒चाय॑ ब्राह्म॑ये ॥
रुचं॑ ब्राह्मं॒ जन॑यन्तः । दे॒वा अ॒ग्रे तद॑ब्रुवन् ।
यस्त्वै॒वं ब्रा॒ह्म॒णो वि॒द्यात् । तस्य॑ दे॒वा अ॒सन् व॑शे ॥
ह्रीश्च॑ते लक्ष्मीश्च॒ पत्न्यौ॑ । अ॒हो॒रा॒त्रे पा॒र्श्वे । नक्ष॑त्राणि रू॒पं ।

अ॒श्विनौ॑ व्या॒त्तं॑ । इ॒ष्टं॑ म॒निषा॑ण । अ॒मुं॑ म॒निषा॑ण । स॒र्वं॑ म॒निषा॑ण ॥

Expansion of हिरण्यगर्भः : (Appearing in T.S.4.1.8.3)

हि॒र॒ण्य॒ग॒र्भः॑ स॒म॒व॒र्त्त॒ता॒ग्रे॑ भू॒त॒स्य॑ जा॒तः॑ प॒ति॒रे॒क॑ आ॒सीत् ।

स दा॒धार॑ पृ॒थि॒वीं॑ द्या॒मु॒ते॒मां॑ क॒स्मै॑ दे॒वाय॑ ह॒विषा॑ वि॒धेम॑ ॥

यः प्रा॒णतो॑ नि॒मिष॑तो म॒हि॒त्वै॒क॑ इ॒द्रा॒जा जग॑तो ब॒भूव॑ ।

य ई॒शो॑ अ॒स्य द्वि॒प॒द॒-श्च॑तु॒ष्प॒दः॑ क॒स्मै॑ दे॒वाय॑ ह॒विषा॑ वि॒धेम॑ ॥

य आ॒त्म॒दा ब॒ल॒दा॑ य॒स्य वि॒श्व॑ उपा॒स॒ते प्र॑शिषं॒ य॒स्य दे॒वाः ।

य॒स्य छा॒या॒मृ॒तं॑ य॒स्य मृ॒त्युः॑ क॒स्मै॑ दे॒वाय॑ ह॒विषा॑ वि॒धेम॑ ॥

य॒स्ये॒मे हि॒म॒व॒न्तो॑ म॒हि॒त्वा य॒स्य स॒मु॒द्रं॑ र॒स॒या स॒हाऽऽहुः॑ ।

य॒स्ये॒माः प्र॒दि॒शो॑ य॒स्य बा॒हू क॒स्मै॑ दे॒वाय॑ ह॒विषा॑ वि॒धेम॑ ॥

यं क्र॒न्द॒सी॒ अव॑सा तस्त॒भाने॑ अ॒भ्यै॑क्षे॒तां म॒न॒सा रे॒ज॒माने॑ ।

य॒त्राधि॑सू॒र उ॒दि॒तौ व्ये॒ति क॒स्मै॑ दे॒वाय॑ ह॒विषा॑ वि॒धेम॑ ॥

येन द्यौरु॒ग्रा पृ॒थि॒वी च दृ॒ढे येन सुवस् स्त॒भितं येन ना॒कः ।
यो अ॒न्तरि॒क्षे रज॒सो वि॒मानः कस्मै दे॒वाय ह॒विषा वि॒धेम ॥
आपो ह यन्म॒हती वि॒श्वमा॒यन्-दक्ष॒न्दधा॒ना ज॒नय॑न्ती-र॒ग्निं ।
ततो दे॒वाना-न्नि॒रव॑र्त्ततासुरे॒कः कस्मै दे॒वाय ह॒विषा वि॒धेम ॥
यश्चि॒दापो म॒हिना पर्य॑पश्यद्-दक्ष॒न्दधा॒ना ज॒नय॑न्ती-र॒ग्निं ।
यो दे॒वेष्वधि॑ दे॒व येक॑ आसीत् कस्मै दे॒वाय ह॒विषा वि॒धेम ॥

अ॒द्भ्यः संभू॑तो हि॒र॒ण्यग॒र्भ इत्य॒ष्टौ ॥

ए॒ष हि दे॒वः प्र॒दि॒शोऽनु॒ सर्वाः पूर्वा॑ हि जा॒तः स उ॒ गर्भे॑ अ॒न्तः ।
स वि॒जाय॑मानः सज॒निष्य॑माणः प्र॒त्यङ्मु॒खा स्तिष्ठ॑ति वि॒श्वतो॑मुखः ॥
वि॒श्वतश्च॑-क्षु॒रुत वि॒श्वतो॑ मुखो वि॒श्वतो॑ ह॒स्त उ॒त वि॒श्वत॑स्पात् ।
सं बा॒हुभ्यां॑ नम॒ति सं प॑त॒त्रैर्-द्या॒वा पृ॒थि॒वी ज॒नय॑न् दे॒व ए॒कः ॥
वे॒नस्त॑त् पश्यन् वि॒श्वा भु॒वनानि॑ वि॒द्वान् यत्र॑ वि॒श्वं भव॑त्ये॒क-नी॒लं ।
यस्मि॑न्नि॒दं स॒ञ्च वि॒चैकं॑ स ओ॒तः प्रो॑तश्च वि॒भुः प्र॒जासु॑ ॥
प्र॒तद्वो॑चे अ॒मृत॑न्नु वि॒द्वान् गन्ध॑र्वो नाम नि॒हितं॑ गुहा॒सु । 3 (10)

T.A.6.1.4

त्रीणि पदा निहिता गुहासु यस्तद्वेद सवितुः पिता सत् ॥
 स नो बन्धुर् जनिता स विधाता धामानि वेद भुवनानि विश्वा ॥
 यत्र देवा अमृतमान-शानास्तृतीये धामान्य-भ्यैरयन्त ॥
 परि द्यावापृथिवी यन्ति सद्यः परि लोकान् परि दिशः परि सुवः ।
 ऋतस्य तन्तुं विततं विचृत्य तदपश्यत् तदभवत् प्रजासु ॥
 परीत्य लोकान् परीत्य भूतानि परीत्य सर्वाः प्रदिशो दिशश्च ।
 प्रजापतिः प्रथमजा ऋतस्यात्मना-ऽऽत्मान-मभि-संबभूव ॥
 सदसस्पति-मद्भुतं प्रियमिन्द्रस्य काम्यं । सनिं मेधा-मयासिषं ॥
 उदीप्यस्व जातवेदो ऽपघ्नन्निर्ऋतिं मम । 4 (10)

T.A.6.1.5

पशूँश्च मह्यमावह जीवनञ्च दिशो दिश ॥
 मानो हिँसी ज्ञातवेदो गामश्चं पुरुषं जगत् ।
 अबिभ्रदग्न आगहि श्रिया मा परिपातय ॥
 पुरुषस्य विद्म सहस्राक्षस्य महादेवस्य धीमहि ।
 तन्नो रुद्रः प्रचोदयात् ॥
 तत्पुरुषाय विद्महे महादेवाय धीमहि । तन्नो रुद्रः प्रचोदयात् ॥

तत्पुरुषाय विद्महे वक्रतुण्डाय धीमहि । तन्नो दन्तिः प्रचोदयात् ॥

तत्पुरुषाय विद्महे चक्रतुण्डाय धीमहि । 5 (10)

T.A.6.1.6

तन्नो नन्दिः प्रचोदयात् ॥

तत्पुरुषाय विद्महे महासेनाय धीमहि । तन्नः षण्मुखः प्रचोदयात् ॥

तत्पुरुषाय विद्महे सुवर्णपक्षाय धीमहि । तन्नो गरुडः प्रचोदयात् ॥

वेदात्मनाय विद्महे हिरण्यगर्भाय धीमहि । तन्नो ब्रह्म प्रचोदयात् ॥

नारायणाय विद्महे वासुदेवाय धीमहि । तन्नो विष्णुः प्रचोदयात् ॥

वज्रनखाय विद्महे तीक्ष्ण-द॒ष्ट्राय धीमहि । 6 (10)

T.A.6.1.7

तन्नो नारसिं॒हः प्रचोदयात् ॥

भास्कराय विद्महे महद्द्युतिकराय धीमहि ।

तन्नो आदित्यः प्रचोदयात् ॥

वैश्वानराय विद्महे लालीलाय धीमहि । तन्नो अग्निः प्रचोदयात् ॥

कात्यायनाय विद्महे कन्यकुमारि धीमहि । तन्नो दुर्गिः प्रचोदयात् ॥

सहस्रपरमा देवी शतमूला शताङ्कुरा ।

सर्वं॑ हर॒तु मे पा॒पं दूर्वा॑ दुःस्वप्न॑ नाशनी ॥
काण्डा॑त्काण्डा॑त् प्र॒रोह॑न्ती॒ परुषः॑ परुषः॑ परि । 7 (10)

T.A.6.1.8

ए॒वा नो॑ दूर्वे॑ प्र॒तनु॑ सह॒स्रेण॑ श॒तेन॑ च ॥
या श॒तेन॑ प्र॒तनो॑षि सह॒स्रेण॑ वि॒रोह॑सि ।
तस्या॑स्ते दे॒वीष्ट॑के वि॒धेम॑ ह॒विषा॑ व॒यं ॥
अश्व॑क्रान्ते॒ रथ॑क्रान्ते वि॒ष्णुक्रान्ते॑ व॒सुन्ध॑रा ।
शि॒रसा॑ धा॒रयि॑ष्यामि रक्ष॒स्व मां प॑दे प॑दे ॥
भूमि॑र् धे॒नुर् ध॑रणी लो॒कधा॑रिणी ।
उ॒धृता॑ऽसि व॒राहे॑ण कृ॒ष्णेन॑ श॒त बा॑हुना ॥
मृ॒त्तिके॑ ह॒न मे पा॒पं य॑न्मया दुष्कृ॒तं कृ॑तं ।
मृ॒त्तिके॑ ब्र॒ह्मद॑त्ताऽसि का॒श्यपे॑नाभि॒मन्त्रि॑ता ।
मृ॒त्तिके॑ दे॒हि मे पु॒ष्टिं त्वयि॑ सर्वं॑ प्र॒तिष्ठि॑तं ॥ 8 (10)

T.A.6.1.9

मृ॒त्तिके॑ प्र॒तिष्ठि॑ते सर्वं॑ त॒न्मे निर्णु॑द मृ॒त्तिके॑ ।
तया॑ ह॒तेन॑ पा॒पेन॑ गच्छामि॒ पर॑मां ग॒तिं ॥
यत॑ इन्द्र॒ भया॑महे॒ ततो॑ नो॒ अभ॑यं कृ॒धि ।

म॒घवन् छ॒ग्धि तव॑ तन्न॒ ऊ॒तये॑ वि॒द्विषो॑ वि॒मृ॒धो ज॒हि ॥
 स्व॒स्ति॒दा वि॒शस्प॑तिर् वृ॒त्रहा॑ वि॒मृ॒धो व॒शी ।
 वृ॒षेन्द्रः॑ पु॒र ए॒तु नः॑ स्व॒स्ति॒दा अ॒भय॑ङ्करः ॥
 स्व॒स्ति न॒ इन्द्रो॑ वृ॒द्धश्र॑वाः स्व॒स्ति नः॑ पू॒षा वि॒श्ववे॑दाः ।
 स्व॒स्ति न॒स्ताक्ष॑र्यो अ॒रिष्ट॑नेमिः स्व॒स्ति नो॑ बृ॒हस्प॑तिर् दधातु ॥
 अ॒पान्त॑मन्यु-स्तृ॒पल॑प्रभ॒र्मा धु॒निः शि॒मीवा॒ञ्छरु॑माञ् ऋ॒जीषी॑ ।
 सो॒मो वि॒श्वान्य॑त॒सा व॒नानि॑ ना॒र्वागि॑न्द्रं प्र॒तिमा॑नानि दे॒भुः ॥ 9 (10)

T.A.6.1.10

ब्र॒ह्म ज॒ज्ञानं॑ प्र॒थमं॑ पु॒रस्ता॑द्-वि॒सी॒मतः॑ सु॒रुचो॑ वे॒न आ॑वः ।
 स बु॒ध्निया॑ उप॒मा अ॒स्य वि॒ष्टाः स॒तश्च॑ यो॒नि-म॑स॒तश्च॑ वि॒वः ॥
 स्यो॒ना पृ॑थि॒वि भ॒वा नृ॑क्ष॒रा नि॒वेश॑नी । य॒च्छा नः॑ श॒र्म स॒प्रथाः॑ ॥
 ग॒न्धद्वा॑रां दु॒राध॑र्षां नि॒त्यपु॑ष्टां क॒रीषि॑णीं ।
 ई॒श्वरी॑ञ् स॒र्वभू॑तानां ता॒मिहो॑प॒ह्वये॑ श्रि॒यं ॥
 श्री॒र्मे भ॑जतु । अ॒लक्ष्मी॑र्मे न॒श्यतु॑ ।
 वि॒ष्णुमु॑खा वै दे॒वा इ॒च्छन्द्वा॑-भि॒रिमा॑ ल्लो॒का-न॑नप॒जय्य॑-म॒भ्यज॑यन् ।
 म॒हाञ् इन्द्रो॑ व॒ज्रबा॑हुः षोड॒शी श॒र्म य॒च्छतु॑ ॥ 10 (10)

T.A.6.1.11

स्व॒स्ति नो॑ म॒घवा॑ करो॒तु ह॑न्तु पा॒प्मानं॑ योऽस्मा॑न् द्वेष्टि॑ ॥
 सो॒मान॒॑ स्व॒रणं॑ कृ॒णुहि॑ ब्र॒ह्म॒णस्प॑ते । क॒क्षी॒वन्तं॑ य औ॒शिजं॑ ।
 शी॒रीरं॑ य॒ज्ञश॑म॒लं कु॒सीदं॑ तस्मि॑न् थ॒सीद॑तु योऽस्मा॑न् द्वेष्टि॑ ॥
 च॒रणं प॒वित्रं॑ वि॒त॒तं पु॒राणं॑ येन॑ पू॒त-स्तर॑ति दुष्कृ॒तानि॑ ।
 तेन॑ प॒वित्रे॑ण शु॒द्धेन॑ पू॒ता अति॑ पा॒प्मान-म॑रातिं॒ तरे॑म ॥
 स॒जोषा॑ इन्द्र॒ सग॑णो म॒रुद्भिः॒ सोमं॑ पिब वृ॒त्रह॑ञ्छूर वि॒द्वान् ।
 ज॒हि श॒त्रूँ॒ रप॑ मृ॒धो नु॒दस्वा॑थाभयं कृ॒णुहि॑ वि॒श्वतो॑ नः ॥
 सु॒मित्रा॑ न आप॒ ओष॑धयः सन्तु दु॒र्मित्रा॑स्तस्मै
 भूया॑सुर् योऽस्मा॑न् द्वेष्टि॑ यञ्च॒ वयं॑ द्वि॒ष्मः ॥
 आपो॑ हि ष्ठा म॒यो भुव॑स्ता न ऊ॒र्जे द॑धातन । 11 (10)

T.A.6.1.12

म॒हेर॑णाय चक्ष॒से । यो वः॑ शि॒वत॑मो रस-स्तस्य॑ भाजयते ह नः ।
 उ॒शती॑-रिव मा॒तरः॑ । तस्मा॑ अर॒ङ्गमा॑मवो यस्य॑ क्षयाय॒ जिन्व॑थ ।
 आपो॑ जनयथा च नः ॥
 हि॒रण्य॑शृङ्गं॒ वरु॑णं प्रपद्ये ती॒र्थं मे॑ देहि याचितः ।
 यन्म॑या भु॒क्त-म॑साधूनां पा॒पेभ्य॑श्च प्र॒तिग्र॑हः ॥

यन्मे॑ मन॒सा वा॒चा क॒र्मणा॑ वा दु॒ष्कृतं॑ कृतं ।
तन्न॑ इन्द्रो॑ वरु॒णो बृ॒हस्प॑तिः सवि॒ता च पु॑नन्तु पुनः॑ पुनः॑ ॥
नमो॑ऽग्नये॑-ऽप्सु॒मते॑ नम॒ इन्द्रा॑य नमो॑ वरु॒णाय॑ नमो॑
वारु॒ण्यै नमो॑ऽद्भ्यः ॥ 12 (10)

T.A.6.1.13

यद॒पां क्रू॒रं य॑दमे॒द्ध्यं य॑दशान्तं॑ तदप॑गच्छतात् ॥
अत्या॑शना-द॒तीपा॑ना-द्यच्च॑ उ॒ग्रात् प्र॑तिग्र॒हात् ।
तन्नो॑ वरु॒णो रा॒जा पा॒णिना॑ ह्यवम॑र्शतु ॥
सोऽह॑मपा॒पो वि॒रजो॑ निर्मु॒क्तो मु॒क्तकि॑ल्बिषः ।
नाक॑स्य पृ॒ष्ठमा॑रुह्य गच्छेद् ब्र॒ह्मस॑लो॒कतां॑ ॥
यश्चा॑प्सु वरु॒णः स पु॑नात्वघम॑र्षणः ॥
इ॒मं मे॑ गङ्गे॑ यमु॒ने सर॑स्वति श॒तुद्रि॑ स्तोम॑ सच॒ता प॑रु॒ष्ण्या ।
अ॒सिक्नि॑या म॒रुद्वृ॑धे वि॒तस्त॑या-ऽऽर्जी॑कीये शृ॒णु॒ह्या सु॒षोम॑या ॥
ऋ॒तञ्च स॑त्यञ्चा-भी॒द्धा त॑पसोऽद्ध्यजा॑यत ।
ततो॑ रा॒त्रि-र॒जाय॑त ततः॑ समु॒द्रो अ॑र्णवः । 13 (10)

T.A.6.1.14

समु॒द्रा-दर्ण॑वा-दधि॑ सम्॑वँ॒त्सरो॑ अजा॒यत॑ ।
 अ॒हो॒रा॒त्राणि॑ वि॒दध॑द् (मि॒दध॑द्) वि॒श्वस्य॑ मि॒षतो॑ व॒शी ॥
 सूर्या॑चन्द्र॒मसौ॑ धा॒ता यथा॑पूर्व॒-मक॑ल्पयत् ।
 दि॒वञ्च॑ पृथि॒वीं चान्तरि॑क्ष-मथो॑ सु॒वः ॥
 यत् पृथि॑व्याञ् रज॒स्स्व मान्तरि॑क्षे वि॒रोद॑सी ।
 इ॒माञ् स्तदा॑पो वरु॒णः पु॒नात्व॑घमर्षणः ॥
 पु॒नन्तु॑ वस॒वः पु॒नातु॑ वरु॒णः पु॒नात्व॑घमर्षणः ।
 ए॒ष भू॒तस्य॑ म॒द्ध्ये भु॒वनस्य॑ गो॒प्ता ॥
 ए॒ष पु॒ण्यकृ॑तां लो॒का॒नेष॑ मृ॒त्योर्. हि॒र॒ण्म॒यं ॥
 द्या॒वापृथि॑व्योर्. हि॒र॒ण्म॒यञ् सञ्श्रि॑तञ् सु॒वः । 14 (10)

T.A.6.1.15

स नः॑ सु॒वः सञ्शि॑शाधि ॥
 आ॒र्द्रं ज्व॑लति॒ ज्योति॑-रह॒मस्मि॑ । ज्योति॑र् ज्व॒लति॒ ब्रह्मा॑ह॒मस्मि॑ ।
 योऽह॑मस्मि॒ ब्रह्मा॑ह॒मस्मि॑ । अह॑मस्मि॒ ब्रह्मा॑ह॒मस्मि॑ ।
 अह॑मे॒वाहं॑ मां जु॒होमि॑ स्वाहा ॥
 अ॒का॒र्य॒का॒र्यव॑की॒र्णी स्ते॒नो भ्रू॑ण॒हा गुरु॑त॒ल्पगः॑ ।

वरु॒णो-ऽपाम॑घमर्ष॒ण-स्तस्मा॑त् पा॒पात् प्र॑मुच्यते ॥
 रजो॑भूमि॒स्त्व मा॑ꣳ रोद॑यस्व प्रव॑दन्ति धीराः ॥
 आक्रान्थ्-समु॒द्रः प्रथ॑मे वि॒धर्म॑-ञ्जन॑यन् प्र॒जा भुव॑नस्य॒ राजा॑ () ।
 वृषा॑ पवि॒त्रे अधि॑सानो अव्ये॑ बृ॒हथ् सोमो॑
 वावृ॑धे सुवा॒न इन्दुः ॥ 15 (11)
 (पर॑स्ताद् - यशो॑ - गुहा॑सु - मम॑ - चक्र॑तुण्डाय॑ धीमहि -
 तीक्ष्ण॑द॒ष्ट्राय॑ धीमहि - परि॑ - प्र॒तिष्ठि॑तं - दे॒भुर् - यच्छ॑तु -
 दधा॑तना- द्भ्यो॑ - ऽर्ण॑वः - सुवो॑ - राजै॑कं च) (A1)

Special Korvai

रुद्रो॑ रु॒द्रश्च॑ दन्ति॒श्च न॑न्दिः षण्मु॒ख ए॒व च॑ ।
 गरु॑डो ब्र॒ह्म वि॒ष्णुश्च॑ ना॒रसि॑ꣳहस्तथै॒व च॑ ।
 आ॒दि॒त्योऽग्नि॑श्च दु॒र्गिश्च॑ क्र॒मेण॑ द्वा॒दशा॑म्भसि ।

Special Korvai

म॒ म॒ व॒ च॒ म॒ सु॒ वे॒ ना॒ व॒ भा॒ वै॒ का॒त्या॒य॒नाय॑ ।

अनुवाकं – 2T.A.6.2.1

जा॒तवे॒द॒से सु॒न॒वाम॒ सोम॑-म॒राती॒यतो॑ नि॒द॒हाति॑ वे॒दः ।
 स नः॑ पर्॒ष॒दति॑ दु॒र्गाणि॒ विश्वा॑ ना॒वेव॒ सिन्धुं॑ दु॒रि॒ताऽत्य॑ग्निः ॥
 ता॒म॒ग्नि॒वर्णां॑ त॒प॒सा ज्व॑लन्तीं॑ वै॒रोच॑नीं॑ क॒र्म॒फ॒लेषु॑ जु॒ष्टां ।
 दु॒र्गा दे॒वीꣳ श॑रण॒म॒हं प्र॑पद्ये सु॒तर॑सि तर॒से नमः॑ ॥
 अ॒ग्ने त्वं पा॑रया न॒व्यो अ॒स्मान्थ् स्व॑स्ति-भिर॑ति दु॒र्गाणि॒ विश्वा॑ ।
 पू॒श्च पृ॒थ्वी बहु॑ला न उ॒र्वी भ॒वा तो॒काय॑ त॒नया॑य श॒म्योः ॥
 विश्वा॑नि नो दु॒र्गहा॑ जा॒तवे॒दः सिन्धुं॑ न ना॒वा दु॒रि॒ताऽति॑पर्षि ।
 अ॒ग्ने अ॒त्रि॒वन् म॑नसा गृ॒णानो॑ऽस्माकं॑ बो॒द्ध्य॒वि॒ता त॒नूनां॑ ॥
 पृ॒त॒ना॒जि॒तꣳ स॑ह॒मान॑-मु॒ग्र॒म॒ग्निꣳ हु॑वेम पर॒माथ् स॒ध॒स्थात् ॥
 स नः॑ पर्॒ष॒दति॑ दु॒र्गाणि॒ विश्वा॑ क्षा॒म॒द्दे॒वो अ॒ति दु॒रि॒ताऽत्य॑ग्निः () ॥
 प्र॒त्नोषि॑-क॒मीड्यो॑ अ॒ध्व॒रेषु॑ स॒नाच्च॑ हो॒ता न॒व्यश्च॑ स॒त्थिस् ।
 स्वा॒ञ्चा॒ग्ने त॒नुवं॑ पि॒प्रय॑स्वा॒स्मभ्य॑ञ्च सौ॒भ॒ग॒माय॑जस्व ॥
 गो॒भिर्-जु॑ष्ट॒म॒युजो॑ नि॒षि॒क्तं त॒वेन्द्र॑ वि॒ष्णो-र॒नु॒सञ्च॑रेम ।
 ना॒क॒स्य पृ॑ष्ठ॒म॒भि स॒म्व॑सानो॒ वैष्ण॑वीं लो॒क इ॒ह मा॑दयन्तां ॥ 16 (14)

(दु॒रि॒ताऽत्य॑ग्निश्च॒त्वारि॑ च) (A2)

अनुवाकं - 3

T.A.6.3.1

भू-र॒न्न-म॒ग्नये॑ पृ॒थिव्यै॑ स्वाहा ,
भुवो॑ऽन्नं वा॒यवे॑ऽन्तरि॒क्षाय॑ स्वाहा,
सुव॒रन्न-मा॒दित्याय॑ दि॒वे स्वाहा ,
भूर्भुव॑स्सुव-र॒न्नं च॒न्द्रम॑से दि॒ग्भ्यः॑ स्वाहा ,
नमो॑ दे॒वेभ्यः॑ स्व॒धा पि॒तृभ्यो॑ भूर्भुव॑स्सुव-र॒न्नमों ॥ 17 (1)

अनुवाकं - 4

T.A.6.4.1

भू-र॒ग्नये॑ पृ॒थिव्यै॑ स्वाहा,
भुवो॑ वा॒यवे॑ऽन्तरि॒क्षाय॑ स्वाहा ,
सुव॒रादि॒त्याय॑ दि॒वे स्वाहा ,
भू-भुव॑स्सुव-श्च॒न्द्रम॑से दि॒ग्भ्यः॑ स्वाहा,
नमो॑ दे॒वेभ्यः॑ स्व॒धा पि॒तृभ्यो॑ भूर्भुव॑स्सुव-र॒ग्न ओं ॥ 18 (1)

अनुवाकं - 5

T.A.6.5.1

भू-र॒ग्नये॑ च पृ॒थिव्यै॑ च म॒हते॑ च स्वाहा ,
भुवो॑ वा॒यवे॑ चा॒न्तरि॒क्षाय॑ च म॒हते॑ च स्वाहा ,

सु॒वरा॑दि॒त्याय॑ च दि॒वे च॑ म॒हते॑ च स्वा॒हा ,
 भू-भूर्भु॒वस्सु॑व-श्च॒न्द्रम॑से च नक्ष॒त्रेभ्य॑श्च दि॒ग्भ्यश्च॑ म॒हते॑ च स्वा॒हा,
 नमो॑ दे॒वेभ्यः॑ स्व॒धा पि॒तृभ्यो॑ भूर्भु॒वस्सु॑वर् म॒हरो॑ ॥ 19 (1)

अनुवाकं – 6

T.A.6.6.1

पा॒हि नो॑ अ॒ग्न ए॒नसे॑ स्वा॒हा । पा॒हि नो॑ वि॒श्ववे॑द॒से स्वा॒हा ।
 य॒ज्ञं पा॒हि वि॒भाव॑सो स्वा॒हा । सर्वं॑ पा॒हि श॑त॒क्रतो॑ स्वा॒हा ॥ 20 (4)

अनुवाकं – 7

T.A.6.7.1

पा॒हि नो॑ अ॒ग्न ए॒कया॑ । पा॒ह्युत॑ द्वि॒तीय॑या । पा॒ह्यूर्जं॑ तृ॒तीय॑या ।
 पा॒हि गी॒र्भि-श्च॑त॒सृभिर्॑ व॒सो स्वा॒हा ॥ 21 (4)

अनुवाकं – 8

T.A.6.8.1

य॒श्छ॑न्द॒सा-मृ॒षभो॑ वि॒श्वरू॑प-श्छ॒न्द्रोभ्य॑ श्छ॒न्दा॒स्या वि॒वेश॑ ।
 स॒चाँ शि॒क्यः॑ पु॒रो वा॒चोप॑निष-दि॒न्द्रो ज्येष्ठ॑ इ॒न्द्रिया॑य ऋषि॒भ्यो
 नमो॑ दे॒वेभ्यः॑ स्व॒धा पि॒तृभ्यो॑ भूर्भु॒वस्सु॑व श्छ॒न्द ओं॑ ॥ 22 (2)

अनुवाकं - 9

T.A.6.9.1

नमो ब्रह्मणे धारणं मे अस्त्व-निराकरणं-धारयिता भूयासं
कर्णयोः श्रुतं माच्योद्वं ममामुष्य ओं ॥ 23 (1)

अनुवाकं - 10

T.A.6.10.1

ऋतं तपः सत्यं तपः श्रुतं तपः शान्तं तपो दम स्तपः शमस्तपो
दानं तपो यज्ञं तपो भूर्भुवस्सुवर्-ब्रह्मैतदुपास्यै-तत्तपः ॥ 24 (1)

अनुवाकं - 11

T.A.6.11.1

यथा वृक्षस्य संपुष्पितस्य दूराद् गन्धो वात्येवं पुण्यस्य कर्मणो
दूराद् गन्धो वाति यथाऽसिधारां कर्त्तेऽवहिता-मवक्रामे यद्युवे युवे
हवा विह्वयिष्यामि कर्त्तं पतिष्यामीत्येव-ममृता-दात्मानं जुगुप्सेत् ॥
25 (1)

अनुवाकं - 12

T.A.6.12.1

अणो-रणीयान् महतो महीया-नात्मा गुहायां निहितोऽस्य जन्तोः ।
तमक्रतुं पश्यति वीतशोको धातुः प्रसादान्-महिमानमीशं ॥
सप्त प्राणाः प्रभवन्ति तस्मात् सप्तार्चिषः समिधः सप्त जिह्वाः ।

सप्त॑ इ॒मे लो॒का ये॒षु च॑रन्ति प्रा॒णा गु॒हाश॑या-न्निहि॒ताः सप्त॑ सप्त ॥
 अतः॑ स॒मु॒द्रा गि॒रयश्च॑ सर्वेऽस्मा॒त् स्य॑न्दन्ते सि॒न्धवः॑ सर्व॒रूपाः ।
 अतश्च॑ वि॒श्वा ओष॑धयो रसाच्च॑ येनैष भू॒त-स्तिष्ठ॑त्यन्तरा॒त्मा ॥
 ब्र॒ह्मा दे॒वानां॑ प॒दवीः॑ क॒वीना-मृषि॑र्-वि॒प्राणां॑ म॒हिषो मृ॒गाणां॑ ।
 श्ये॒नो गृ॒ध्राणां॑ स्व॒धिति॑र्-व॒नानां॑ सोमः॑ पवि॒त्र-म॒त्येति॑ रेभन् ॥
 अ॒जामे॒कां लो॒हितशु॒क्लकृ॑ष्णां ब॒र्हीं प्र॒जां ज॒नय॑न्तीं सरू॒पां ।
 अ॒जो ह्ये॒को जु॒षमाणोऽनु॑शेते जहा॒त्येनां॑ भु॒क्त-
 भो॒गाम॒जोऽन्यः॑ ॥ 26 (10)

T.A.6.12.2

ह॒सः शु॒चिष॑द् वसु॒-रन्त॑रिक्ष-स॒द्भोता॑ वेदिष-दति॒थिर्-दु॒रोण॑सत् ।
 नृष॑द्वर-स॒दृत॑-सद् व्यो॒म-सद॑ब्जा गो॒जा ऋ॒तजा॑
 अ॒द्रिजा॑ ऋ॒तं बृ॒हत् ॥
 घृ॒तं मि॒मिक्षि॑रे घृ॒तम॑स्य योनि॑र्-घृ॒ते श्रि॒तो घृ॒तमु॑वस्य धाम ।
 अ॒नुष्व॑धमावह मा॒दय॑स्व स्वा॒हाकृ॑तं वृषभ वक्षि ह॒व्यं ॥
 स॒मु॒द्रा-दूर्मि॑र्-मधु॒मा उ॒दार-दु॒पाशु॑ना स॒ममृ॑तत्व-मा॒नट् ।
 घृ॒तस्य॑ नाम गु॒ह्यं य॑दस्ति जि॒ह्वा दे॒वानां॑-म॒मृत॑स्य नाभिः ॥

व॒यं॒ नाम॒ प्र॒ब्र॒वामा॒ घृ॒तेना॒स्मिन् य॒ज्ञे धा॒रयामा॒ नमो॑भिः ।
 उप॒ ब्र॒ह्मा शृ॒णव॑च्छ॒स्यमा॒नं चतु॑श्शृ॒ङ्गो ऽव॒मीद् गौ॒र ए॒तत् ॥
 च॒त्वारि॒ शृ॒ङ्गा त्रयो॑ अ॒स्य पा॒दा द्वे शी॒र्षे स॒प्त ह॒स्तासो॑ अ॒स्य ।
 त्रि॒धा ब॒द्धो वृ॒षभो॑ रौर॒वीति॑ म॒हो दे॒वो म॒र्त्याँ आ॒विवेश॑ ॥ 27 (10)

T.A.6.12.3

त्रि॒धा हि॒तं प॒णिभि॑र् गु॒ह्यमा॒नं गवि॑-दे॒वासो॑ घृ॒तम॑न्ववि॒न्दन् ।
 इन्द्र॑ ए॒कँ सूर्य॑ ए॒कं ज॒जान॑ वे॒नादे॒कँ स्व॒धया॑ नि॒ष्टत॑क्षुः ॥
 यो दे॒वानां॑ प्र॒थमं॑ पु॒रस्ता॑द् वि॒श्वाधि॑यो रु॒द्रो म॒हर्षिः॑ ।
 हि॒र॒ण्यग॒र्भं प॑श्य॒त जा॒यमा॑नँ स॒नो दे॒वः शु॒भया॑ स्मृ॒त्या स॒म्यु॑नक्तु ॥
 यस्मा॑त्प॒रं ना॒पर॑ म॒स्ति कि॒ञ्चि॒द्यस्मा॑न् ना॒णीयो॑ न ज्य॒यायो॑ऽस्ति
 कश्चित् ।
 वृ॒क्ष इ॒व स्त॒ब्धो दि॒वि तिष्ठ॑-त्ये॒कस्ते॒नेदं॑ पू॒र्णं पु॒रुषे॑ण स॒र्वं ॥
 न क॑र्मणा न प्र॒जया॑ ध॒नेन॑ त्या॒गेनै॑के अ॒मृत॑त्व-मा॒नशुः॑ ।
 प॒रेण॑ ना॒कं नि॒हितं॑ गु॒हायां॑ वि॒भ्राज॑दे॒तद् यत॑यो वि॒शन्ति॑ ॥
 वे॒दान्त॑वि॒ज्ञान॑-सु॒निश्चि॑तार्थाः स॒न्यास॑ यो॒गाद्य॑तयः शु॒द्धस॑त्त्वाः ।
 ते ब्र॑ह्मलो॒के तु प॑रान्त॒काले॑ प॒रामृ॑तात् परि॒मुच्य॑न्ति स॒र्वे () ॥

द॒हं वि॒पापं॑ पर॒मैश॑मभू॒तं य॑त् पु॒ण्डरी॑कं पु॒रम॑द्ध्य स॒ञ्स्थं ।
तत्रा॒पि द॒हं ग॒गनं॑ वि॒शोक॑-स्तस्मिन् यदन्तस्त-दुपा॑सितव्यं ॥
यो वेदा॑दौ स्वरः प्रो॒क्तो वेदा॑न्ते च प्र॒तिष्ठि॑तः ।
तस्य॑ प्रकृ॒ति-ली॑नस्य यः परः स म॒हेश्वरः॑ ॥ 28 (14)

(अ॒जोऽन्य॑ - आ॒वि॒वेश॑ - स॒र्वे च॒त्वारि॑ च) (A12)

अनुवाकं – 13

T.A.6.13.1

स॒हस्र॑शीर्षं दे॒वं वि॒श्वाक्षं॑ वि॒श्वश॑म्भु॒वं ।
वि॒श्वं ना॒राय॑णं दे॒वम॑क्षरं पर॒मं प॑दं ॥
वि॒श्वतः॑ पर॒मान्नि॒त्यं वि॒श्वं ना॒राय॑णं ह॒रिं ।
वि॒श्वमे॒वेदं॑ पु॒रुष॑-स्तद् वि॒श्वमु॑पजीवति ॥
प॒तिं वि॒श्वस्या॑त्मे॒श्वरं॑ शा॒श्वतं॑ शि॒वम॑च्युतं ।
ना॒राय॑णं म॒हाज्ञे॑यं वि॒श्वात्मा॑नं प॒राय॑णं ॥
ना॒राय॑ण प॒रो ज्यो॒तिरा॑त्मा ना॒राय॑णः प॒रः ।
ना॒राय॑ण प॒रं ब्र॒ह्म त॒त्त्वं ना॒राय॑णः प॒रः ।
ना॒राय॑ण प॒रो ध्या॒ता ध्या॒नं ना॒राय॑णः प॒रः ॥
यच्च॑ किञ्चि॒ज्-ज॒गत् स॒र्वं दृ॒श्यते॑ श्रूय॒तेऽपि॑ वा । 29 (10)

T.A.6.13.2

अन्तर् ब॒हिश्च॑ तथ् सर्वं व्याप्य॑ नारायणः स्थितः ॥
 अनन्त॑मव्ययं कवि॑ꣳ समु॒द्रेऽन्तं॑ विश्वशं॑भुवं ।
 पद्म॑कोश-प्रतीकाश॑ꣳ हृदयं चाप्यधो॑मुखं ॥
 अधो॑ निष्क्या वितस्त्यान्ते॑ नाभ्यामुपरि॑ तिष्ठति ।
 ज्वा॒लमा॒लाकु॑लं भाती विश्वस्यायतनं॑ महत् ॥
 सन्तत॑ꣳ शि॒लाभिस्तु॑ लंब॒त्या को॒शसन्नि॑भं ।
 तस्यान्ते॑ सुषि॒रꣳ सूक्ष्मं॑ तस्मिन्त् सर्वं॑ प्रतिष्ठितं ॥
 तस्य॑ मद्ध्ये॑ म॒हान॑ग्निर् विश्वार्चि॑र् विश्वतो॑ मुखः ।
 सोऽग्र॑भुग् विभजन् तिष्ठन्-नाहार-मजरः॑ कविः ।
 तिर्य॑गूर्ध्वमधः॑ शायी रश्मयस्तस्य॑ सन्तता () ॥
 सन्तापयति॑ स्वं देहमापादतल॑ मस्तगः ।
 तस्य॑ मद्ध्ये॑ वह्निशिखा॑ अणीयोर्द्ध्वा॑ व्यवस्थितः ॥
 नीलतो॑ यद मद्ध्यस्थाद् विद्युल्लेखेव॑ भास्वरा ।
 नीवार॑ शूकवत्तन्वी पीता भास्वत्यणूपमा ॥
 तस्याः॑ शिखाया॑ मद्ध्ये॑ परमात्मा॑ व्यवस्थितः ।

स ब्रह्म स शिवः स हरिः सेन्द्रः सोऽक्षरः परमः स्वराट् ॥ 30 (16)

(अपि वा – सन्तता षट् च) (A13)

अनुवाकं – 14

T.A.6.14.1

आदित्यो वा एष एतन् मण्डलं तपति तत्र ता ऋचस्तदृचा मण्डलं
स ऋचां लोकोऽथ य एष एतस्मिन् मण्डलेऽर्चिर् दीप्यते तानि
सामानि स साम्नां लोकोऽथ य एष एतस्मिन् मण्डलेऽर्चिषि
पुरुषस्तानि यजूंषि स यजुषा मण्डलं स यजुषां लोकः सैषा
त्रय्येव विद्या तपति य एषोऽन्त-रादित्ये हिरण्मयः पुरुषः ॥ 31 (1)

अनुवाकं – 15

T.A.6.15.1

आदित्यो वै तेज ओजो बलं यश-श्चक्षुः श्रोत्रमात्मा मनो मन्युर्-
मनुर्-मृत्युः सत्यो मित्रो वायुराकाशः प्राणो लोकपालः कः किं
कं तथ् सत्यमन्न-ममृतो जीवो विश्वः कतमः स्वयंभु ब्रह्मैतदमृत
एष पुरुष एष भूताना-मधिपतिर्-ब्रह्मणः सायुज्यं सलोकता-
माप्नो-त्येतासामेव देवतानां सायुज्यं सार्ष्टितां समान
लोकता-माप्नोति य एवं वेदैत्युपनिषत् ॥ 32 (1)

अनुवाकं – 16

T.A.6.16.1

नि॒ध॒न॒प॒त॒ये॒ नमः॑ । नि॒ध॒न॒प॒ता॒न्ति॒काय॑ नमः ।

ऊ॒र्ध्वाय॑ नमः । ऊ॒र्ध्व॒लि॒ङ्गाय॑ नमः ।

हि॒र॒ण्य॒ाय॑ नमः । हि॒र॒ण्य॒लि॒ङ्गाय॑ नमः ।

सु॒व॒र्णाय॑ नमः । सु॒व॒र्ण॒लि॒ङ्गाय॑ नमः ।

दि॒व्याय॑ नमः । दि॒व्य॒लि॒ङ्गाय॑ नमः । 33 (10)

T.A.6.16.2

भ॒वाय॑ नमः । भ॒व॒लि॒ङ्गाय॑ नमः ।

श॒र्वाय॑ नमः । श॒र्व॒लि॒ङ्गाय॑ नमः ।

शि॒वाय॑ नमः । शि॒व॒लि॒ङ्गाय॑ नमः ।

ज्व॒लाय॑ नमः । ज्व॒ल॒लि॒ङ्गाय॑ नमः ।

आ॒त्माय॑ नमः । आ॒त्म॒लि॒ङ्गाय॑ नमः ।

प॒र॒माय॑ नमः । प॒र॒म॒लि॒ङ्गाय॑ नमः ।

ए॒त॒त्सो॒मस्य॑ सूर्य॒स्य॑ स॒र्व॒लि॒ङ्गं॑ स्था॒प॒य॒ति॑ पा॒णि॒म॒न्त्रं॑

प॒वि॒त्रं॑ ॥ 34 (13)

अनुवाकं – 17

T.A.6.17.1

सद्योजा॑तं प्रपद्या॑मि सद्योजा॑ताय वै नमो॑ नमः॑ ।
भवे॑ भवे॑ नाति॑भवे भवस्व॑ मां । भवोद्भवा॑य नमः॑ ॥ 35 (3)

अनुवाकं – 18

T.A.6.18.1

वामदे॑वाय नमो॑ ज्येष्ठा॑य नमः॑ श्रेष्ठा॑य नमो॑ रुद्रा॑य नमः॑ काला॑य नमः॑
कल॑विकर॒णाय नमो॑ बल॑विकर॒णाय नमो॑ बला॑य नमो॑
बल॑प्रमथ॒नाय नमः॑ सर्व॑भूतदम॒नाय नमो॑ मनो॑न्मना॒य नमः॑ ॥ 36 (1)

अनुवाकं – 19

T.A.6.19.1

अघो॑रेभ्योऽथ॑ घो॑रेभ्यो॑ घो॒रघो॑रतरेभ्यः॑ ।
सर्वे॑भ्यः सर्व॑ शर्वे॑भ्यो॑ नमस्ते॑ अस्तु॑ रुद्र॑रूपेभ्यः॑ ॥ 37 (2)

अनुवाकं – 20

T.A.6.20.1

तत्पु॑रुषाय विद्महे॑ महा॑देवाय॑ धीमहि॑ ।
तन्नो॑ रुद्रः॑ प्रचो॑दयात् ॥ 38 (2)

अनुवाकं – 21

T.A.6.21.1

ई॒शानः॑ सर्व॑विद्या॒ना- मी॒श्वरः॑ सर्व॑भू॒ता॒नां ब्र॒ह्माधि॑पति॒र् ब्र॒ह्म॒णोऽधि॑पति॒र्
ब्र॒ह्मा शि॒वो मे॑ अस्तु॒ सदा॑शि॒वो ॥ 39 (1)

अनुवाकं – 22

T.A.6.22.1

नमो॑ हिर॒ण्यबा॑हवे॒ हिर॒ण्यव॑र्णाय॒ हिर॒ण्यरू॑पाय॒ हिर॒ण्यप॑तये॒ ऽंबिका॑पतय
उ॒माप॑तये॒ पशु॑पतये॒ नमो॑ नमः॒ ॥ 40 (1)

अनुवाकं – 23

T.A.6.23.1

ऋ॒तं स॒त्यं परं॑ ब्र॒ह्म पु॒रुषं॑ कृ॒ष्णपि॒ङ्गलं॑ ।
ऊ॒र्ध्वरे॑तं वि॒रूपा॒क्षं वि॒श्वरू॑पाय॒ वै नमो॑ नमः॒ ॥ 41 (2)

अनुवाकं – 24

T.A.6.24.1

सर्वो॑ वै रु॒द्रस्तस्मै॑ रु॒द्राय॑ नमो॑ अस्तु ।
पु॒रुषो॑ वै रु॒द्रः सन्म॑हो नमो॑ नमः॒ ।
वि॒श्वं भू॒तं भु॒वनं॑ चि॒त्रं बहु॑धा जा॒तं जा॒यमा॑नं च॒ यत् ।
सर्वो॑ ह्येष रु॒द्रस्तस्मै॑ रु॒द्राय॑ नमो॑ अस्तु ॥ 42 (4)

अनुवाकं – 25

T.A.6.25.1

क॒द्रु॒द्राय॑ प्र॒चे॒त॒से॑ मी॒ढु॒ष्ट॒माय॑ तव्य॒से । वो॒चे॒म॒ श॒न्त॒म॒ꣳ ह॒दे ॥
सर्वो॑ ह्ये॒ष रु॒द्रस्त॑स्मै रु॒द्राय॑ नमो॑ अस्तु ॥ 43 (3)

अनुवाकं – 26

T.A.6.26.1

यस्य॑ वैक॒ङ्क॒त्य॒ग्नि॒-हो॒त्र॒हव॑णी भवति॒ प्रत्ये॒वा-स्या॑हु॒तय॑-
स्ति॒ष्ठन्त्य॑थो॒ प्रति॑ष्ठित्यै ॥ 44 (1)

अनुवाकं – 27

T.A.6.27.1

(This Expansion is appearing in T.S.1.2.14.1 for कृ॒णु॒ष्व पा॒ज

इति॑ पञ्च ।

कृ॒णु॒ष्व पा॒जः प्र॒सि॒ति॒न्न पृ॒थ्वीं॑ ँ॒याहि॑ रा॒जे॒वा॒म॒वाꣳ इ॒भे॒न ।
तृ॒ष्वी॒म॒नु प्र॒सि॒तिं दू॒णा॒नोऽस्ता॑ऽसि॒ वि॒द्ध्य॑ र॒क्ष॒स॒ स्त॒पि॒ष्ठैः ॥ 1

तव॑ भ्र॒मा॒स आ॒शु॒या प॒त॒न्त्य॑नु॒ स्पृ॒श धृ॒ष॒ता शो॑शु॒चा॒नः ।
तपू॑ꣳष्य॒ग्ने जु॒ह्वा प॒त॒गा॒न स॒न्दि॒तो वि॒सृ॒ज वि॒ष्व गु॒ल्काः ॥ 2

प्र॒ति॒स्प॒शो॒ वि॒सृ॒ज॒ तू॒र्णि॒ त॒मो॒ भ॒वा॒ पा॒युर् वि॒शो॒ अ॒स्या॒ अ॒द॒ब्धः॑ ।
यो॒ नो॒ दू॒रे॒ अ॒घ॒श॒सो॒ यो॒ अ॒न्त्य॒ग्ने॒ मा॒कि॒ष्टे॒ व्य॒थि॒रा
द॒ध॒र्षी॒त् ॥ 3

उ॒द॒ग्ने॒ ति॒ष्ठ॒ प्र॒त्या॒ त॒नु॒ष्व॒न्य॒ मि॒त्रा॒ ओ॒ष॒ता॒त् ति॒ग्म॒हे॒ते॑ ।
यो॒ नो॒ अ॒रा॒ति॒स॒मि॒धा॒न॒ च॒क्रे॒ नी॒चा॒तं॑ ध॒क्ष्य॒त॒ स॒न्न॒ शु॒ष्कं॑ ॥ 4

ऊ॒र्ध्वो॒ भ॒व॒ प्र॒ति॒वि॒द्ध्य॒-ध॒य॒स्म॒दा॒ वि॒ष्कृ॑णुष्व॒ दै॒व्या॑न्यग्ने ।
अ॒व॒स्थि॒रा॒ त॒नु॒हि॒ या॒तु॒ जू॒नां॑ जा॒मि॒म॒जा॒मिं॑ प्र॒मृ॒णी॒हि॒ श॒त्रून्॑ ॥ 5

कृ॒णु॒ष्व पा॒ज इ॒ति॒ प॒ञ्च॑ ॥ 45 (1)

अनुवाकं - 28

T.A.6.28.1

अ॒दि॒तिर्-दे॒वा ग॒न्ध॒र्वा म॒नु॒ष्याः॑ पि॒त॒रो-ऽसु॒रा-स्ते॒षा॒ सर्व॑ भू॒ता॒नां॑
मा॒ता मे॒दि॒नी॒ म॒ह॒ता॒ म॒ही सा॒वि॒त्री गा॒य॒त्री ज॒ग॒त्यु॒र्वी पृ॒थ्वी॑ ब॒हु॒ला
वि॒श्वा भू॒ता क॒त॒मा का॒या सा स॒त्ये-त्य॒मृ॒ते॒ति॒ व॒सि॒ष्ठः॑ ॥ 46 (1)

अनुवाकं – 29

T.A.6.29.1

आपो॒ वा इ॒दं॑ सर्वं॑ वि॒श्वा भू॒तान्यापः॑ प्रा॒णा वा आपः॑ प॒शव॑
 आपोऽन्न॒मापो॑ – ऽमृत॒मापः॑ स॒म्राडापो॑ वि॒राडापः॑ स्व॒राडाप॑
 इ॒च्छन्दा॑ ऽस्यापो॒ ज्योती॑ ऽष्यापो॒ यजू॑ ऽष्यापः॑ स॒त्यमापः॑ सर्वा॑
 दे॒वता॒ आपो॒ भूर्भुव॑स्सुवराप॒ ओं ॥ 47 (1)

अनुवाकं – 30

T.A.6.30.1

आपः॑ पुनन्तु पृथि॒वीं पृथि॒वी पू॒ता पुना॑तु मां ।
 पुनन्तु॑ ब्र॒ह्मण॑स्पतिर् ब्र॒ह्म पू॒ता पुना॑तु मां ॥
 यदुच्छि॑ष्ट – म॒भोज्यं॑ य॒द्वा दुश्च॑रितं मम ।
 सर्वं॑ पुनन्तु॒ मामापो॑ – ऽस॒ताञ्च॑ प्र॒तिग्र॑ह ऽ स्वाहा ॥ 48 (4)

अनुवाकं – 31

T.A.6.31.1

अ॒ग्निश्च॑ मा म॒न्युश्च॑ म॒न्युप॑तयश्च म॒न्युकृ॑तेभ्यः ।
 पा॒पेभ्यो॑ रक्षन्तां । यद॒ह्मा पा॑पमकार्षं ।
 म॒नसा॑ वा॒चा ह॒स्ताभ्यां॑ । प॒द्भ्या – मु॒दरे॑ण शि॒श्जा ।
 अ॒हस्त॑द॒वलु॑पतु । य॒त्किञ्च॑ दु॒रितं॑ मयि ।

इ॒दम॑ह–मा॒ममृ॑त यो॒नौ ।

स॒त्ये ज्यो॑तिषि जु॒होमि॑ स्वा॒हा ॥ 49 (9)

अनुवाकं – 32

T.A.6.32.1

सूर्य॑श्च मा म॒न्युश्च॑ म॒न्युप॑तयश्च म॒न्युकृ॑तेभ्यः ।

पा॒पेभ्यो॑ रक्ष॒न्तां । यद् रा॒त्रिया॑ पा॒पम॑का॒र्षं ।

म॒नसा॑ वा॒चा ह॒स्ताभ्यां॑ । प॒द्भ्या–मु॒दरे॑ण शि॒श्जा ।

रा॒त्रि–स्त॑द॒वलु॑पतु । य॒त्किञ्च॑ दु॒रितं॑ म॒यि ।

इ॒दम॑ह–मा॒ममृ॑त यो॒नौ । सूर्ये॑ ज्यो॒तिषि॑ जु॒होमि॑ स्वा॒हा ॥ 50 (9)

अनुवाकं – 33

T.A.6.33.1

ओ॒मित्ये॑काक्ष॒रं ब्र॒ह्म । अ॒ग्निर्दे॑वता ब्र॒ह्म इ॒त्या॒र्षं ।

गा॒य॒त्रं छ॒न्दं प॑रमा॒त्मं स॒रूपं॑ । सा॒युज्यं॑ वि॒नियो॑गं ॥ 51 (4)

अनुवाकं – 34

T.A.6.34.1

आ॒यातु॑ व॒रदा॑ दे॒वी अ॒क्षरं॑ ब्र॒ह्म सं॒मितं॑ ।

गा॒य॒त्रीं छ॒न्दसां॑ मा॒तेदं॑ ब्र॒ह्म जु॒षस्व॑ मे ।

यद॒हात् कुरु॑ते पा॒पं तद॒हात् प्र॒तिमु॑च्यते ।

यद् रात्रियात् कुरुते पापं तद् रात्रियात् प्रतिमुच्यते ।
 सर्वं वर्णे महादेवि सन्ध्या विद्ये सरस्वति ॥ 52 (5)

अनुवाकं – 35

T.A.6.35.1

ओजोऽसि सहोऽसि बलमसि भ्राजोऽसि देवानां धामनामाऽसि
 विश्वमसि विश्वायुः सर्वमसि सर्वायु-रभिभूरो गायत्री-मावाहयामि
 सावित्री-मावाहयामि सरस्वती-मावाहयामि छन्दर्षी-नावाहयामि
 श्रिय-मावाहयामि गायत्रिया गायत्री छन्दो विश्वामित्र
 ऋषिः सविता देवताऽग्निर्मुखं ब्रह्मा शिरो विष्णुर् हृदयं रुद्रः
 शिखा पृथिवीयोनिः प्राणापान-व्यानोदान-समाना सप्राणा श्वेतवर्णा
 साङ्ख्यायन-सगोत्रा गायत्री चतुर्विंशत्यक्षरा त्रिपदा
 षट्कुक्षिः पञ्च शीर्षोपनयने विनियोग,
 ओं भूः । ओं भुवः । ओं सुवः । ओं महः । ओं जनः ।
 ओं तपः । ओं सत्यं । ओं तथ् सवितुर्वरेण्यं भर्गो देवस्य धीमहि ।
 धियो यो नः प्रचोदयात् ।
 ओमापो ज्योतीरसोऽमृतं ब्रह्म भूर्भुवस्सुवरो ॥ 53 (10)

अनुवाकं - 36

T.A.6.36.1

उ॒त्त॒मे॒ शि॒ख॒रे॒ जा॒ते॒ भू॒म्यां॑ प॒र्व॒त॒ मूर्द्द॑ध॒नि ।
ब्रा॒ह्म॒णै॑भ्यो-ऽभ्य॒नु॒ज्ञा॒ता ग॒च्छ॒ दे॒वि य॒था॒सु॒खं ॥
स्तु॒तो म॒या व॒रदा॑ वे॒दमा॒ता प्र॒चो॒दय॑न्ती प॒वने॑ द्वि॒जा॒ता ।
आ॒युः पृ॒थि॒व्यां द्र॒वि॒णं ब्र॒ह्म॒व॒र्च॒सं म॒ह्यं द॒त्वा प्र॒जातुं॑
ब्र॒ह्म॒लो॒कं ॥ 54 (4)

अनुवाकं - 37

T.A.6.37.1

घृ॒णिः सू॒र्य आ॒दि॒त्यो न॒ प्रभा॑-वा॒त्यक्ष॑रं । म॒धु॒क्षर॑न्ति तद् र॒सं ।
स॒त्यं वै तद् र॒स-मा॒पो ज्यो॒तीर॒सोऽमृ॑तं ब्र॒ह्म
भूर्भु॒वस्सु॒वरो॑ ॥ 55 (3)

अनुवाकं - 38

T.A.6.38.1

ब्र॒ह्ममे॒तु मां॑ । म॒धुमे॒तु मां॑ । ब्र॒ह्ममे॒व म॒धुमे॒तु मां॑ ॥
यास्ते॑ सोम॒ प्र॒जाव॑त्सो-ऽभि॒सो अ॒हं । दुःष्व॑प्न॒हन् दु॒रुष्ष॑ह ।
यास्ते॑ सोम॒ प्रा॒णाऽस्तान् जु॒होमि॑ ॥
त्रि॒सु॒पर्ण॑ म॒याचि॑तं ब्रा॒ह्म॒णाय॑ दद्यात् । ब्र॒ह्म॒ह॒त्यां वा ए॒ते घ्न॑न्ति ।

ये ब्रा॒ह्म॒णा-स्त्रि॒सु॒पर्णं॑ प॒ठन्ति॑ । ते सोमं प्राप्नुवन्ति ।

आ॒स॒ह॒स्रात् प॒ङ्क्तिं॑ पुनन्ति । ओं ॥ 56 (12)

अनुवाकं – 39

T.A.6.39.1

ब्र॒ह्म मे॒धया॑ । म॒धु मे॒धया॑ । ब्र॒ह्ममे॒व म॒धु मे॒धया॑ ॥

अ॒द्या नो॑ दे॒व स॒वितः॑ प्र॒जाव॑त्स॒ावीः सौ॒भ॒गं ।

प॒रा दुः॒ष्व॒प्निय॑ सु॒व ।

वि॒श्वानि॑ दे॒व स॒वित॑र् दु॒रि॒तानि॑ प॒रासु॒व । यद् भ॒द्रं तन्म॑ आ॒सु॒व ॥

म॒धुवा॒ता ऋ॒ताय॑ते म॒धुक्ष॑रन्ति सिन्ध॒वः । मा॒ध्वी॒र्नः स॒न्त्वोष॑धीः ।

म॒धु न॑क्तमु॒तोष॑सि म॒धुम॑त् पा॒र्थि॒व॒ रजः॑ । म॒धु द्यौ॑रस्तु नः पि॒ता ।

म॒धुमा॒न्नो व॒नस्प॑ति॒र् म॒धुमा॑ अस्तु सूर्यः ।

मा॒ध्वी॒र्गा॒वो भ॑वन्तु नः ॥

य इ॒मं त्रि॒सु॒पर्ण-म॑या॒चितं॑ ब्रा॒ह्म॒णाय॑ दद्यात् ।

भ्रू॒ण॒ह॒त्यां वा ए॒ते घ्न॑न्ति । ये ब्रा॒ह्म॒णा-स्त्रि॒सु॒पर्णं॑ प॒ठन्ति॑ ।

ते सोमं प्राप्नुवन्ति । आ॒स॒ह॒स्रात् प॒ङ्क्तिं॑ पुनन्ति । ओं ॥ 57 (19)

अनुवाकं - 40

T.A.6.40.1

ब्र॒ह्मा मे॒धवा॑ । मधु॑ मे॒धवा॑ । ब्र॒ह्ममे॒व मधु॑ मे॒धवा॑ ॥
ब्र॒ह्मा दे॒वानां॑ प॒दवीः॑ क॒वीना-मृ॒षिर् वि॒प्राणां॑ म॒हिषो॑ मृ॒गाणां॑ ।
श्ये॒नो गृ॒द्ध्राणां॑ स्व॒धिति॑र् व॒नानां॑ सोमः॑ प॒वित्र-म॒त्येति॑ रे॒भन् ॥
ह॒सः शु॒चिष॑द् वसु॒रन्तरि॑क्ष स॒द्धोता- वे॒दिष-द॒तिथि॑र्
दु॒रोण॑सत् ।

नृ॒षद्व॑र-स॒दृत्-सद् व्यो॑म-स॒दब्जा- गो॒जा ऋ॒तजा॑
अ॒द्रिजा॑ ऋ॒तं बृ॒हत् ॥
ऋ॒चेत्वा रु॒चेत्वा स॒मिथ् स्र॑वन्ति स॒रितो॑ न धे॒नाः ।
अ॒न्तर् हृ॒दा म॒नसा॑ पू॒यमा॑नाः । घृ॒तस्य॑ धा॒रा अ॒भिचा॑क॒शीमि॑ ।
हि॒र॒ण्ययो॑ वे॒तसो॑ म॒द्ध्य आ॑सां ।
तस्मि॑न् सु॒पर्णो॑ म॒धुकृ॑त् कु॒लायी॑ भ॒जन्नास्ते॑ म॒धु दे॒वता॑भ्यः ।
तस्या॑सते ह॒रयः॑ स॒प्तती॑रे स्व॒धां दु॒हाना॑ अ॒मृत॑स्य धा॒रां ।
य इ॒दं त्रि॑सु॒पर्ण-म॒याचि॑तं ब्रा॒ह्मणा॑य दद्यात् ।

वी॒र॒ह॒त्यां वा ए॒ते घ्न॑न्ति । ये ब्रा॒ह्म॒णा-स्त्रि॑सु॒पर्णं॑ प॒ठन्ति॑ ।
ते सोमं प्राप्नु॑वन्ति । आ॒स॒ह॒स्रात् प॒ङ्क्तिं पुन॑न्ति । ओं ॥ 58 (19)

अनुवाकं – 41

T.A.6.41.1

मे॒धादे॒वी जु॒षमा॑णा न आ॒गाद् वि॒श्वाची॑ भ॒द्रा सु॑मन॒स्यमा॑ना ।
त्वया जु॒ष्टा नु॒दमा॑ना दुरु॒क्तान् बृ॒हद्व॑दे॒म वि॒दथे॑ सु॒वीराः॑ ॥
त्वया जु॒ष्ट ऋ॒षिर् भ॑वति दे॒वि त्वया ब्र॒ह्मा ऽऽग॑तश्रीरु॒त त्वया॑ ।
त्वया जु॒ष्टश्चि॒त्रं वि॑न्दते वसु॒ सा नो जु॑षस्व द्र॒वि॒णो न॑मे॒धे ॥ 59 (4)

अनुवाकं – 42

T.A.6.42.1

मे॒धां म इन्द्रो॑ ददातु मे॒धां दे॒वी सर॑स्वती ।
मे॒धां मे अ॒श्विना-वु॒भावा॑ध॒तां पु॒ष्कर॑स्रजा ॥
अ॒प्सरा॑सु च या मे॒धा ग॑न्धर्वेषु च यन्मनः ।
दै॒वीं मे॒धा सर॑स्वती सा मां मे॒धा सु॒रभि॑र् जुषता स्वाहा ॥ 60 (4)

अनुवाकं – 43

T.A.6.43.1

आ॒मां मे॒धा सु॒रभि॑र् वि॒श्वरू॑पा हि॒र॒ण्यव॑र्णा जगती जग॒म्या ।
ऊ॒र्ज॑स्वती पयसा पि॒न्वमा॑ना सा मां मे॒धा सु॒प्रती॑का जुषन्तां ॥ 61 (2)

अनुवाकं - 44

T.A.6.44.1

मयि॑ मे॒धां मयि॑ प्र॒जां मय्य॑ग्निस्तेजो॑ दधातु मयि॑ मे॒धां मयि॑ प्र॒जां
मयीन्द्र॑ इन्द्रि॒यं दधातु॑ मयि॑ मे॒धां मयि॑ प्र॒जां मयि॑ सूर्यो॑ भ्राजो॑

दधातु ॥ 62 (1)

अनुवाकं - 45

T.A.6.45.1

अपै॑तु मृ॒त्यु-रमृ॑तन्न आ॒गन् वैव॑स्वतो नो॒ अभय॑ङ्कृणोतु ।
पर्णं॑ व॒नस्प॑ते-रिवा॒भिनः॑ शी॒यता॑ र॒यिः सच॑तान्नः

श॒चीप॑तिः ॥ 63 (2)

अनुवाकं - 46

T.A.6.46.1

परं॑ मृ॒त्यो अनु॑ परेहि पन्थां॑ य॒स्तेस्व॑ इ॒तरो॑ दे॒वयाना॑त् ।
चक्षु॑ष्मते शृण्व॒ते ते ब्र॑वीमि मानः॑ प्र॒जा री॑रिषो मोत

वी॒रान् ॥ 64 (2)

अनुवाकं – 47

T.A.6.47.1

वा॒तं प्रा॒णं॒ मन॑सान्वा॒रभा॑महे प्र॒जाप॑तिं॒ यो भु॑व॒नस्य॑ गो॒पाः ।

स॒नो मृ॒त्यो स्त्रा॑यतां॒ पा॒त्व॒हसो॑ ज्यो॒ग् जी॒वा

ज॒राम॑शीमहि ॥ 65 (2)

अनुवाकं – 48

T.A.6.48.1

अ॒मु॒त्रभू॑या॒दध॒ यद्य॑मस्य॒ बृ॒हस्प॑ते अ॒भि॒शस्ते॑र मु॒ञ्चः ।

प्र॒त्यौ॒हता॒-म॒श्विना॑ मृ॒त्यु-म॒स्माद् दे॒वाना॑म॒ग्ने भि॒षजा॑ श॒चीभिः॑ ॥ 66 (2)

अनुवाकं – 49

T.A.6.49.1

ह॒रि॒ह॒रन्त॑- म॒नुय॑न्ति दे॒वा वि॒श्वस्ये॑शानं॒ वृष॑भं म॒तीनां॑ ।

ब्र॒ह्म स॒रूप॑म॒नुमे॑दमा॒गा-द॒यनं॑ मा वि॒वधी॑र् वि॒क्रम॑स्व ॥ 67 (2)

अनुवाकं – 50

T.A.6.50.1

श॒ल्कै॒रग्नि॑-मि॒न्धान॑ उ॒भौ लो॒कौ स॒नेम॑हं ।

उ॒भयो॑ लो॒कयो॑र् ऋ॒ध्वा॒ति मृ॒त्युं त॒राम्य॑हं ॥ 68 (2)

अनुवाकं - 51

T.A.6.51.1

मा छि॒दो मृ॒त्यो मा व॑धीर् मा मे ब॒लं वि॒वृ॒हो मा प्र॑मो॒षीः ।
प्र॒जां मा मे॑ री॒रिष॑ आ॒यु॒रु॒ग्र नृ॒चक्ष॑सं त्वा ह॒विषा॑ वि॒धेम ॥ 69 (2)

अनुवाकं - 52

T.A.6.52.1

मा नो॑ म॒हान्त॑मु॒त मा नो॑ अ॒र्भकं॑ मा न उ॒क्षन्त॑मु॒त मा न उ॒क्षितं॑ ।
मा नो॑ व॒धीः पि॒तरं॑ मो॒त मा॒तरं॑ प्रि॒या मा न॑स्त॒नुवो॑
रु॒द्र री॒रिषः॑ ॥ 70 (2)

अनुवाकं - 53

T.A.6.53.1

मा न॑स्तो॒के तन॑ये मा न आ॒युषि॑ मा नो गो॒षु मा नो॑ अ॒श्वेषु॑ री॒रिषः॑ ।
वी॒रा॒न्मा नो॑ रु॒द्र भा॒मि॒तो॒व॒धीर्-ह॒विष्म॑न्तो नम॒सा वि॒धेम ते ॥ 71 (2)

अनुवाकं - 54

T.A.6.54.1

प्र॒जाप॑ते न त्वदे॒ता-न्य॑न्यो वि॒श्वा जा॒तानि॑ परि॒ता ब॑भूव ।
यत् का॒मास्ते॑ जुहु॒मस्त॑न्नो अस्तु व॒यं स्या॑म प॒तयो॑ रयी॒णां ॥ 72 (2)

अनुवाकं – 55

T.A.6.55.1

स्व॒स्ति॒दा॒ वि॒श॒स्प॒ति॒र् वृ॒त्र॒हा॒ वि॒मृ॒धो॑ व॒शी ।
वृ॒षे॒न्द्रः॑ पु॒र ए॒तु न॒स्स्व॒स्ति॒दा॒ अ॒भय॑ङ्क॒रः ॥ 73 (2)

अनुवाकं – 56

T.A.6.56.1

त्र्य॑ंब॒कं य॑जामहे सु॒गन्धिं॑ पु॒ष्टि॒वर्द्ध॑नं ।
उ॒र्वा॒रु॒कमि॑व बन्ध॒नान्-मृ॒त्योर् मु॒क्षी॒य माऽमृ॑तात् ॥ 74 (2)

अनुवाकं – 57

T.A.6.57.1

ये ते स॒हस्र॑मयु॒तं पा॒शा मृ॒त्यो म॒र्त्या॒य ह॑न्त॒वे ।
ता॒न् य॒ज्ञस्य॑ मा॒यया॑ सर्वा॒नव॑ यजामहे ॥ 75 (2)

अनुवाकं – 58

T.A.6.58.1

मृ॒त्य॒वे स्वा॑हा मृ॒त्य॒वे स्वा॑हा ॥ 76 (1)

अनुवाकं – 59

T.A.6.59.1

दे॒वकृ॑तस्यै॒नसो॑ ऽव॒यज॑नम॒सि स्वा॑हा ।
म॒नु॒ष्यकृ॑तस्यै॒नसो॑ ऽव॒यज॑नम॒सि स्वा॑हा ।

पितृ॒कृत॑स्यै॒नसो॑ ऽवय॑जनमसि॒ स्वाहा॑ ॥
 आ॒त्मकृ॑तस्यै॒नसो॑ ऽवय॑जनमसि॒ स्वाहा॑ ॥
 अ॒न्यकृ॑तस्यै॒नसो॑ ऽवय॑जनमसि॒ स्वाहा॑ ॥
 अ॒स्मत्कृ॑तस्यै॒नसो॑ ऽवय॑जनमसि॒ स्वाहा॑ ॥
 यद्वि॒वा च॑ न॒क्तं चै॒नश्च॑कृ॒म तस्या॑वय॑जनमसि॒ स्वाहा॑ ॥
 यथ् स्व॑प॒न्तश्च॑ जाग्र॒त-श्चै॒नश्च॑-कृ॒म तस्या॑वय॑जनमसि॒ स्वाहा॑ ॥
 यथ् सु॒षुप्त॑श्च जाग्र॒त-श्चै॒नश्च॑-कृ॒म तस्या॑वय॑जनमसि॒ स्वाहा॑ ॥
 यद् वि॒द्वाँस॑श्चा वि॒द्वाँस॑श्चै॒नश्च॑-कृ॒म तस्या॑वय॑जनमसि॒ स्वाहा॑ ॥
 ए॒नस॑ ए॒नसो॑वय॑जनमसि॒ स्वाहा॑ ॥ 77 (11)

अनुवाकं - 60

T.A.6.60.1

यद्वो दे॒वाश्च॑कृ॒म जि॒ह्वया॑ गु॒रुम॑नसो वा प्र॒युती॑ दे॒वहे॑डनं ।
 अ॒रावा॑यो नो अ॒भिदु॑च्छु॒नाय॑ते तस्मिन् तदे॒नो व॑सवो
 नि॒धेत॑न॒ स्वाहा॑ ॥ 78 (2)

अनुवाकं – 61

T.A.6.61.1

कामोऽकार्षीन् नमो नमः ।

कामोऽकार्षीत् कामः करोति नाहं करोमि

कामः कर्त्ता नाहं कर्त्ता कामः कारयिता नाहं कारयिता एष ते

काम कामाय स्वाहा ॥ 79 (2)

अनुवाकं – 62

T.A.6.62.1

मन्युरकार्षीन् नमो नमः ।

मन्युरकार्षीन् मन्युः करोति नाहं करोमि मन्युः कर्त्ता नाहं कर्त्ता

मन्युः कारयिता नाहं कारयिता एष ते मन्यो मन्यवे स्वाहा ॥ 80 (2)

अनुवाकं – 63

T.A.6.63.1

तिलाञ्जुहोमि सरसाञ् सपिष्टान् गन्धार मम चित्ते रमन्तु स्वाहा ॥

गावो हिरण्यं धनमन्नपानञ् सर्वेषाञ् श्रियै स्वाहा ॥

श्रियञ्च लक्ष्मिञ्च पुष्टिञ्च कीर्त्तिं चा नृण्यतां ।

ब्रह्मण्यं बहुपुत्रतां । श्रद्धामेधे प्रजाः सन्ददातु स्वाहा ॥ 81 (5)

अनुवाकं - 64

T.A.6.64.1

तिलाः कृष्णा-स्ति॒लाः श्वे॒ता-स्ति॒लाः सौ॒म्या व॑शानु॒गाः ।
तिलाः पुन॑न्तु मे पा॒पं य॑त्किञ्चिद् दुरि॑तं मयि स्वा॒हा ॥
चो॒रस्या॑न्नं नव॒श्राब्दं ब्र॒ह्महा॑ गुरु॒तल्प॑गः ।
गो॒स्तेय॑ञ् सुरा॒पानं॑ भ्रू॒णह॑त्या तिला शान्ति॑ञ् शम॒यन्तु॑ स्वा॒हा ॥
श्री॑श्च लक्ष्मी॑श्च पु॒ष्टीश्च की॑र्त्तिं चा नृ॒ण्यतां॑ ।
ब्र॒ह्मण्यं॑ बहु॒पुत्र॑तां ।
श्रद्धा॑मेधे प्र॒ज्ञातु॑ जा॒तवे॑दः स॒न्ददा॑तु स्वा॒हा ॥ 82 (7)

अनुवाकं - 65

T.A.6.65.1

प्रा॒णापा॑न-व्या॒नोदा॑न-समा॒ना मे शु॑द्ध्यन्तां
ज्योति॑रहं वि॒रजा॑ विपा॒प्मा भू॑यास॒ञ् स्वा॒हा ॥
वाङ्-मन॑-श्चक्षुः-श्रो॒त्र-जि॒ह्वा-घ्रा॑ण-रेतो-बु॒द्ध्याकू॑तिः सङ्कल्पा
मे शु॑द्ध्यन्तां ज्योति॑रहं वि॒रजा॑ विपा॒प्मा भू॑यास॒ञ् स्वा॒हा ॥
त्वक्-चर्म॑-मा॒स-रु॒धिर॑-मेदो॑-मज्जा-स्नाय॒वो-ऽस्थी॑नि
मे शु॑द्ध्यन्तां ज्योति॑रहं वि॒रजा॑ विपा॒प्मा भू॑यास॒ञ् स्वा॒हा ॥

शिरः पाणि पाद पार्श्व पृष्ठो-रूदर-जङ्घ-शिश्नोपस्थ पायवो

मे शुद्ध्यन्तां ज्योतिरहं विरजा विपाप्मा भूयासः स्वाहा ॥

उत्तिष्ठ पुरुष हरित-पिङ्गल लोहिताक्षि देहि देहि ददापयिता

मे शुद्ध्यन्तां ज्योतिरहं विरजा विपाप्मा भूयासः स्वाहा ॥ 83 (5)

अनुवाकं – 66

T.A.6.66.1

पृथिव्याप स्तेजो वायु-राकाशा मे शुद्ध्यन्तां

ज्योतिरहं विरजा विपाप्मा भूयासः स्वाहा ॥

शब्द-स्पर्श-रूपरस-गन्धा मे शुद्ध्यन्तां

ज्योतिरहं विरजा विपाप्मा भूयासः स्वाहा ॥

मनो-वाक्-काय-कर्माणि मे शुद्ध्यन्तां

ज्योतिरहं विरजा विपाप्मा भूयासः स्वाहा ॥

अव्यक्तभावै-रहङ्कारैर् ज्योतिरहं विरजा विपाप्मा भूयासः स्वाहा ॥

आत्मा मे शुद्ध्यन्तां ज्योतिरहं विरजा विपाप्मा भूयासः स्वाहा ॥

अन्तरात्मा मे शुद्ध्यन्तां ज्योतिरहं विरजा विपाप्मा भूयासः स्वाहा ॥

परमात्मा मे शुद्ध्यन्तां ज्योतिरहं विरजा विपाप्मा भूयासः स्वाहा ॥

क्षुधे स्वाहा ॥ क्षुत्पिपासाय स्वाहा ॥

विवि॒ट्त्वै॒ स्वाहा॑ । ॥ ऋ॒ग्वि॒धा॒नाय॑ स्वाहा॑ ॥ क॒षो॒त्का॒य स्वाहा॑ ॥

क्षु॒त्पि॒पा॒सा॒मलं॑ ज्ये॒ष्ठाम॒लक्ष्मी॑र् ना॒शया॒म्यहं॑ ।

अ॒भू॒ति-म॒समृ॒द्धिञ्च॑ सर्वा॒न् (सर्वा॑) निर्णु॒द मे॑ पा॒प्मान॑ ७ स्वाहा॑ ॥

अ॒न्नम॑य-प्रा॒णम॑य-म॒नोम॑य-वि॒ज्ञान॑मय-मा॒नन्द॑मय-मा॒त्मा

मे शु॒द्ध्य॒न्तां ज्यो॑ति॒ र॒हं वि॒रजा॑ वि॒पाप्मा॑ भू॒यास॑ ७ स्वाहा॑ ॥ 84 (15)

अनुवाकं - 67

T.A.6.67.1

अ॒ग्नये॑ स्वाहा॑ । वि॒श्वेभ्यो॑ दे॒वेभ्यः॑ स्वाहा॑ । ध्रु॒वाय॑ भू॒माय॑ स्वाहा॑ ।

ध्रु॒वक्षि॑तये स्वाहा॑ । अ॒च्यु॒तक्षि॑तये स्वाहा॑ । अ॒ग्नये॑ स्वि॒ष्टकृ॑ते स्वाहा॑ ॥

ध॒र्माय॑ स्वाहा॑ । अ॒ध॒र्माय॑ स्वाहा॑ । अ॒द्भ्यः॑ स्वाहा॑ ।

ओ॒षधि॑वन॒स्पति॑भ्यः स्वाहा॑ । 85 (10)

T.A.6.67.2

र॒क्षोदे॑व॒जने॑भ्यः स्वाहा॑ ।

गृ॒ह्याभ्यः॑ स्वाहा॑ । अ॒वसा॑नेभ्यः स्वाहा॑ । अ॒वसा॑न॒पति॑भ्यः स्वाहा॑ ।

सर्व॑भू॒तेभ्यः॑ स्वाहा॑ । का॒माय॑ स्वाहा॑ । अ॒न्तरि॑क्षा॒य स्वाहा॑ ।

यदे॒जति॑ ज॒गति॑ यच्च॑ चेष्ट॒ति ना॒म्नो भा॒गोऽयं॑ ना॒म्ने स्वाहा॑ ।

पृ॒थि॒व्यै स्वाहा॑ । अ॒न्तरि॑क्षा॒य स्वाहा॑ । 86 (10)

T.A.6.67.3

दिवे॑ स्वाहा॑ । सूर्या॑य स्वाहा॑ । चन्द्र॑मसे स्वाहा॑ । नक्ष॑त्रेभ्यः स्वाहा॑ ।
 इन्द्रा॑य स्वाहा॑ । बृह॑स्पतये स्वाहा॑ । प्रजा॑पतये स्वाहा॑ ।
 ब्रह्म॑णे स्वाहा॑ । स्वधा॑ पित॑रुभ्यः स्वाहा॑ ।
 नमो॑ रुद्रा॑य पशु॑पतये स्वाहा॑ । 87 (10)

T.A.6.67.4

देवे॑भ्यः स्वाहा॑ । पित॑रुभ्यः स्वधा॑ऽस्तु । भू॒तेभ्यो॑ नमः॑ ।
 मनु॑ष्येभ्यो हन्ता॑ । प्रजा॑पतये स्वाहा॑ । परमे॑ष्ठिने स्वाहा॑ ॥
 यथा॑ कूपः॑ शत॑धारः सह॑स्रधारो॑ अक्षि॑तः ।
 ए॒वा मे॑ अस्तु॑ धान्यं॑ सह॑स्रधार-मक्षि॑तं । धन॑धान्यै स्वाहा॑ ॥
 ये भू॒ताः प्र॒चर॑न्ति दि॒वान॑क्तं बलि॑-मिच्छ॑न्तो वि॒तुद॑स्य प्रे॒ष्याः () ।
 तेभ्यो॑ बलिं॑ पु॒ष्टिका॑मो ह॒रामि॑ मयि॒ पुष्टिं॑ पु॒ष्टिप॑तिर् दधातु॑
 स्वाहा॑ ॥ 88 (11)

(ओष॑धिव॒नस्प॑तिभ्यः स्वाहा॑ – ऽन्तरि॑क्षाय स्वाहा॑ – नमो॑ रुद्रा॑य
 पशु॑पतये स्वाहा॑ – वि॒तुद॑स्य प्रे॒ष्या एकं॑ च) (A67)

अनुवाकं - 68

T.A.6.68.1

ओं तद् ब्रह्म । ओं तद् वायुः । ओं तदात्मा । ओं तथ् सत्यं ।

ओं तथ् सर्वं । ओं तत् पुरोर् नमः ।

अन्तश्चरति भूतेषु गुहायां विश्व मूर्तिषु ।

त्वं यज्ञस्त्वं ँषट्कारस्त्व-मिद्रस्त्वँ रुद्रस्त्वं-विष्णुस्त्वं ब्रह्मत्वं

प्रजापतिः ।

त्वं तदाप आपो ज्योतीरसोऽमृतं ब्रह्म भूर्भुवस्सुवरो ॥ 89 (9)

अनुवाकं - 69

T.A.6.69.1

श्रद्धायां प्राणे निविष्टोऽमृतं जुहोमि ।

श्रद्धायामपाने निविष्टोऽमृतं जुहोमि ।

श्रद्धायां व्याने निविष्टोऽमृतं जुहोमि ।

श्रद्धायामुदाने निविष्टोऽमृतं जुहोमि ।

श्रद्धायाँ समाने निविष्टोऽमृतं जुहोमि ।

ब्रह्मणि म आत्माऽमृतत्वाय ॥ अमृतोपस्तरणमसि ॥

श्रद्धायां प्राणे निविष्टोऽमृतं जुहोमि । शिवो मा विशाप्रदाहाय ।

॥
 प्रा॒णाय॒ स्वाहा॑ ।
 श्र॒द्धाया॑म॒पाने॑ नि॒विष्टो॑ऽमृतं जुहोमि ।
 शि॒वो मा॑ वि॒शाप्र॑दाहाय । अ॒पानाय॒ स्वाहा॑ ॥
 श्र॒द्धायां॑ ॥ व्या॒ने नि॒विष्टो॑ऽमृतं जुहोमि । शि॒वो मा॑ वि॒शाप्र॑दाहाय ।
 व्या॒नाय॒ स्वाहा॑ ॥
 श्र॒द्धाया॑-मु॒दाने॑ नि॒विष्टो॑ऽमृतं जुहोमि ।
 शि॒वो मा॑ वि॒शाप्र॑दाहाय । उ॒दानाय॒ स्वाहा॑ ॥
 श्र॒द्धाया॑ꣳ स॒माने॑ नि॒विष्टो॑ऽमृतं जुहोमि । शि॒वो मा॑ वि॒शाप्र॑दाहाय ।
 स॒मानाय॒ स्वाहा॑ ॥
 ब्र॒ह्मणि॑ म आ॒त्माऽमृत॑त्वाय ॥ अ॒मृता॑पि॒धानम॑सि ॥ 90 (24)

अनुवाकं – 70

T.A.6.70.1

॥
 श्र॒द्धायां॑ प्रा॒णे नि॒विश्या॑ऽमृतं हु॒तं । प्रा॒णम॑न्ने॒नाप्या॑यस्व ।
 श्र॒द्धाया॑म॒पाने॑ नि॒विश्या॑ऽमृतं हु॒तं । अ॒पानम॑न्ने॒नाप्या॑यस्व ।
 श्र॒द्धायां॑ ॥ व्या॒ने नि॒विश्या॑ऽमृतं हु॒तं । व्या॒नम॑न्ने॒नाप्या॑यस्व ।
 श्र॒द्धाया॑-मु॒दाने॑ नि॒विश्या॑ऽमृतं हु॒तं । उ॒दानम॑न्ने॒नाप्या॑यस्व ।

श्रद्धाया॑ समाने॑ निवि॒श्या॑ऽमृत॑ हु॒तं ।

समानमन्त्रेनाप्यायस्व ॥ 91 (10)

अनुवाकं - 71

T.A.6.71.1

अङ्गु॑ष्ठमा॒त्रः पु॒रुषो॑ऽङ्गु॑ष्ठञ्च॒ समा॑श्रितः ।

ई॒शः सर्व॑स्य जगतः प्रभुः प्रीणाति विश्वभुक् ॥ 92 (2)

अनुवाकं - 72

T.A.6.72.1

वाङ्म॑ आ॒सन् । न॒सोः प्रा॒णः । अ॒क्ष्यो-श्चक्षुः॑ । क॒र्णयोः॑ श्रोत्रं॑ ।

बा॒हुवो॑र् बलं॑ । ऊ॒रुवो॑रोजः । अ॒रि॒ष्टा वि॒श्वान्यङ्गानि॑ त॒नूः ।

त॒नुवा॑ मे स॒ह नम॑स्ते अस्तु मा मा हि॒प्सीः ॥ 93 (8)

अनुवाकं - 73

T.A.6.73.1

वयः॑ सु॒पर्णा॑ उप॒सेदु॑रिन्द्रं प्रि॒यमे॑धा ऋषयो॑ नाध॒मानाः॑ ।

अप॑द्ध्वान्तमूर्णुहि॑ पू॒र्धिचक्षु॑र् मुमु॒ग्ध्यस्मान्

नि॒धये॑ऽवब॒द्धान् ॥ 94 (2)

अनुवाकं – 74

T.A.6.74.1

प्रा॒णानां॑ ग्र॒न्थिर॑सि रु॒द्रो मा॑ वि॒शान्त॑कः ।

तेना॒न्नेना॑-प्याय॒स्व ॥ 95 (2)

अनुवाकं – 75

T.A.6.75.1

नमो॑ रु॒द्राय॑ वि॒ष्णवे॑ मृ॒त्युर्मे॑ पा॒हि ॥ 96 (1)

अनुवाकं – 76

T.A.6.76.1

त्वम॑ग्ने द्यु॒भि-स्त्व॑मा॒शु-शु॒क्षणि॑-स्त्वम॑द्भ्य-स्त्वम॑श्म॒नस्प॑रि ।

त्वं व॑ने॒भ्य-स्त्वमो॑ष॒धीभ्य॑-स्त्वं नृ॒णां नृ॑पते जाय॒से शु॒चिः ॥ 97 (2)

अनुवाकं – 77

T.A.6.77.1

शि॒वेन॑ मे स॒न्तिष्ठ॑स्व स्यो॒नेन॑ मे स॒न्तिष्ठ॑स्व सु॒भूतेन॑ मे स॒न्तिष्ठ॑स्व

ब्र॒ह्मव॑र्च॒सेन॑ मे स॒न्तिष्ठ॑स्व य॒ज्ञस्य॑र्दि॒ध मनु॑ स॒न्तिष्ठ॑स्वोप॒ ते

य॒ज्ञ नम॑ उप॒ ते नम॑ उप॒ ते नमः॑ ॥ 98 (1)

अनुवाकं - 78

T.A.6.78.1

स॒त्यं परं॑ पर॒ऽ स॒त्यऽ स॒त्येन॑ न सु॒वर्गा-ल्लो॒काच्च्य॑वन्ते
क॒दाच॑न स॒ताऽ हि स॒त्यं तस्मा॑त् स॒त्ये र॑मन्ते, (1)

तप॑ इति॒ तपो॑ नान॒शना॑त् परं॑ य॒दिध॑ परं॑ तप॒स्तद् दु॒धर्षं॑
तद् दु॒राध॑र्षं॒ तस्मा॑त् तप॒सि र॑मन्ते, (2)

दम॑ इति॒ निय॑तं ब्रह्म॒चारि॑ण-स्तस्मा॑द् दमे॑ र॒मन्ते, (3)

शम॑ इत्य॒रण्ये॑ मु॒नय॑-स्तस्मा॑च्छमे॑ र॒मन्ते, (4)

दा॒नमि॑ति॒ सर्वा॑णि भू॒तानि॑ प्र॒श॒ऽस॑न्ति दा॒नान्ना॑ति दु॒श्चरं॑
तस्मा॑द् दा॒ने र॑मन्ते, (5)

धर्म॑ इति॒ धर्मे॑ण॒ सर्व॑मिदं॒ परि॑गृहीतं॒ धर्मा॑न्नाति-दु॒ष्करं॑
तस्मा॑द् -ध॒र्मे र॑मन्ते, (6)

प्र॒जन॑ इति॒ भूया॑ऽस-स्तस्मा॑द् भूयि॒ष्टाः प्र॑जायन्ते॒ तस्मा॑द् भूयि॒ष्टाः
प्र॒जन॑ने र॒मन्ते, (7)

ऽग्नय॑ इत्या॒ह तस्मा॑-द॒ग्नय॑ आधा॒तव्या॑ अ॒ग्निहो॒त्र-मि॒त्याह॑
तस्मा॑-द॒ग्निहो॒त्रे र॒मन्ते॑, (8)

य॒ज्ञ इति॑ य॒ज्ञो हि दे॒वा स्तस्मा॑द् य॒ज्ञे र॒मन्ते॑, (9)

मा॒नस॑-मि॒ति वि॒द्वाꣳस॑-स्तस्मा॑द् वि॒द्वाꣳस॑ ए॒व मा॒नसे॑
र॒मन्ते॑, (10)

न्या॒स इति॑ ब्र॒ह्मा ब्र॒ह्मा हि प॒रः प॒रो हि ब्र॒ह्मा ता॒नि वा ए॒तान्य॑व॒राणि॑
प॒राꣳसि॑ न्या॒स ए॒वात्य॑रेचयद् य ए॒वं वैदे॑त्युपनिषत् ॥ (11) / 99 (1)

अनुवाकं – 79

T.A.6.79.1

प्रा॒जाप॑त्यो हा॒रुणिः॑ सु॒पर्णे॑यः प्र॒जाप॑तिं पि॒तर॑-मु॒प॒स॒सार॑ किं
भ॒गव॑न्तः प॒रमं॑ वैद॒न्तीति॑ तस्मै॑ प्रो॒वाच॑, (1)

स॒त्येन॑ वा॒युरा॑वाति स॒त्ये-ना॑दि॒त्यो रो॑चते दि॒वि स॒त्यं वा॒चः प्र॑ति॒ष्ठा
स॒त्ये स॒र्वं प्र॑ति॒ष्ठितं॑ तस्मा॑त् स॒त्यं प॒रमं॑ वैद॒न्ति, (2)

तपसा दे॒वा दे॒वता-म॒ग्र आ॒यन् तप॒सर्ष॒यः सु॒वर॒न्व-वि॒न्दन् तपसा
स॒प॒त्नान् प्र॒णु॒दा-मा॒राती स्तप॒सि स॒र्वं प्र॒ति॒ष्ठितं तस्मा॒त् तपः
प॒र॒मं व॑दन्ति, (3)

द॒मेन दा॒न्ताः कि॒ल्बिष॑-मव॒धून्व॒न्ति द॒मेन ब्र॒ह्म॒चा॒रिणः सु॒वर॒गच्छ॒न् द॒मो
भू॒तानां॑ दु॒राध॒र्षं द॒मे स॒र्वं प्र॒ति॒ष्ठितं तस्मा॒द् द॒मः प॒र॒मं व॑दन्ति, (4)

श॒मेन शा॒न्ताः शि॒व-मा॒चर॑न्ति श॒मेन ना॒कं मु॒नयो-ऽन्व॑वि॒न्द॒ञ्छ॒मो
भू॒तानां॑ दु॒राध॒र्षं छ॒मे स॒र्वं प्र॒ति॒ष्ठितं तस्मा॒च्छ॒मः प॒र॒मं व॑दन्ति, (5)

दा॒नं य॒ज्ञानां॑ व॒रूथं॑ दक्षि॒णा लो॒के दा॒तार॑ः स॒र्वं भू॒तान्यु॑पजी॒वन्ति
दा॒नेना॒राती-र॒पानु॑दन्त दा॒नेन॑ द्विष॒न्तो मि॒त्रा भ॑वन्ति दा॒ने स॒र्वं प्र॒ति॒ष्ठितं
तस्मा॒द् दा॒नं प॒र॒मं व॑दन्ति, (6)

ध॒र्मो वि॒श्वस्य॑ जग॒तः प्र॒ति॒ष्ठा लो॒के ध॒र्मिष्ठं॑ प्र॒जा उ॑प॒सर्प॑न्ति ध॒र्मेण॑
पा॒प-म॒प॒नु॒दति॑ ध॒र्मे स॒र्वं प्र॒ति॒ष्ठितं तस्मा॒द् ध॒र्मं प॒र॒मं व॑दन्ति, (7)

प्र॒जन॑नं वै प्र॒ति॒ष्ठा लो॒के सा॒धु प्र॒जाया॑ स्तन्तुं-त॒न्वा॒नः पि॒तृणा॑
म॒नृ॒णो भ॑वति तदे॒व त॒स्या अ॒नृ॒णं तस्मा॒त् प्र॒जन॑नं प॒र॒मं व॑द, (8)

न्त्य॒ग्नयो॒ वै त्रयी॑ वि॒द्या दे॒वयानः॑ पन्था॒ गार्.ह॒पत्य॑ ऋक्-पृथि॒वी
रथ॑न्तर -मन्वा॒हार् य॒पच॑नं॒ यँजु॒रन्तरि॑क्षं॒ यँवाम॑दे॒व्य-मा॒हव॒नीयः॑
सा॒मसु॒वर्गो॑ लो॒को बृ॒हत्-तस्मा॑-द॒ग्नीन् पर॑मं॒ यँवद॑, (9)

न्त्य॒ग्निहो॒त्रः सा॒यं प्रा॒तर् गृ॒हाणां॑ निष्कृ॒तिः स्वि॒ष्टः सु॒हुतं॑ यँज॒क्रतू॑
नां प्रा॒यणः॑ सु॒वर्गस्य॑ लो॒कस्य॑ ज्योति॒-स्तस्मा॑-द॒ग्निहो॒त्रं
पर॑मं॒ यँवद॑न्ति, (10)

य॒ज्ञ इति॑ य॒ज्ञेन॑ हि दे॒वा दि॒वं गता॑ य॒ज्ञेना॑सु॒रा-न॑पा॒नुद॑न्त य॒ज्ञेन॑
द्विष॑न्तो मि॒त्रा भव॑न्ति य॒ज्ञे सर्वं॑ प्र॒तिष्ठि॑तं॒ तस्माद् य॒ज्ञं
पर॑मं॒ यँवद॑न्ति, (11)

मा॒नसं॑ यँवै प्रा॒जाप॑त्यं प॒वित्रं॑ मा॒नसे॒न म॑न॒सा सा॒धु प॑श्यति मा॒नसा॑
ऋ॒षयः॑ प्र॒जा अ॑सृ॒जन्त मा॒नसे॒ सर्वं॑ प्र॒तिष्ठि॑तं॒ तस्मा॑न्
मा॒नसं॑ पर॑मं॒ यँवद॑न्ति, (12)

न्या॒स इ॒त्याहु॑र् म॒नीषि॑णो॒ ब्र॒ह्माणं॑ ब्र॒ह्मा वि॒श्वः क॑तमः
स्वयं॑भुः प्र॒जाप॑तिः स॒म्व॑थ्स॒र इति॑, (13)

सम्॑व॒त्सरो॑ ऽसा॒वादित्यो॑ य ए॒ष आ॒दित्ये॑ पु॒रुषः॑ स
पर॑मे॒ष्टी ब्र॒ह्मा॒त्मा, (14)

या॒भि॒रा॒दि॒त्य-स्त॑प॒ति र॒श्मि॒भि॒स्ता॒भिः प॒र्जन्यो॑ व॒र्षति॑ प॒र्जन्ये॑-
नौष॑धि-वनस्प॒तयः॑ प्र॒जाय॑न्त ओष॑धिवनस्प॒तिभिः॑-र॒त्नं भव॑त्य॒न्नेन॑
प्रा॒णाः प्रा॒णैर् ब॒लं ब॒लेन॑ तप॒-स्तप॑सा श्र॒द्धा श्र॒द्धया॑ मे॒धा मे॒धया॑
मनी॑षा मनी॒षया॑ मनो॒ मन॑सा शान्तिः॒ शान्त्या॑ चि॒त्तं चि॒त्तेन॑ स्मृ॒तिः
स्मृ॒त्या स्म॑र॒स्मारे॑ण वि॒ज्ञानं॑ वि॒ज्ञाने॑-ना॒त्मानं॑ वे॒दय॑ति तस्मा॒द॒न्नं
द॒दन्थ् सर्वा॑ण्ये॒तानि॑ द॒दा-त्य॑न्नात् प्रा॒णा भव॑न्ति भू॒तानां॑ प्रा॒णैर् मनो॑
मन॑सश्च वि॒ज्ञानं॑ वि॒ज्ञाना॑-दान॒न्दो ब्र॒ह्म यो॒निः, (15)

स वा ए॒ष पु॒रुषः॑ पञ्च॒धा पञ्चा॒त्मा येन॑ सर्व॒मिदं॑ प्रो॒तं पृ॒थि॒वी
चा॒न्तरि॑क्षं च द्यौश्च दि॒शश्चा॒वान्तर॑दि॒शाश्च॑ स वै सर्व॒मिदं॑ जग॒त्स
स॒भूतः॑ स भ॒व्यं जि॒ज्ञास॑ क्लृ॒प्त ऋ॒तजा॑ रयि॒ष्ठा श्र॒द्धा स॒त्यो
मह॑स्वान् तप॒सो परि॑ष्ठाद्, (वरि॑ष्ठाद्) (16)

ज्ञा॒त्वा तमे॒वं मन॑सा ह॒दा च॑ भू॒यो न मृ॒त्यु-मु॒पया॑हि वि॒द्वान् (17)

तस्मा॑-न्या॒स-मे॒षां तप॑सा-मति॑रिक्तमाहु॑र, (18)

वसु॑र॒ण्वो वि॒भूर॑सि प्रा॒णे त्वम॑सि सन्धा॒ता ब्र॑ह्मन् त्वम॑सि
विश्व॑धृ॒त्तेजो॑दा स्त्वम॑स्यग्नि-र॒सि वर्चो॑दा-स्त्वम॑सि सूर्य॑स्य
द्यु॒म्नोदा॑ स्त्वम॑सि च॒न्द्रम॑स उप॒याम॑गृहीतोऽसि ब्र॑ह्म॒णो॑
त्वा॒ मह॑स, (19)

ओमि॑त्यात्मानं॑ यु॒ञ्जीतै॑तद्वै॒ महो॑पनिषदं दे॒वानां॑ गु॒ह्यं य॑ ए॒वं वे॑द
ब्र॑ह्म॒णो महि॑मान-मा॒प्नोति॑ तस्मा॑द् ब्र॑ह्म॒णो
महि॑मान-मि॒त्युप॑निषत् ॥ (20) / 100 (1)

अनुवाकं – 80

T.A.6.80.1

तस्यै॒वं वि॒दुषो॑ य॒ज्ञस्या॒त्मा यज॑मानः-श्र॒द्धाप॑त्नी शरी॒र-मि॒द्धम॑मु॒रो
वेदि॑र् लो॒मानि॑ ब॒र्हिर् वे॒दः शि॒खा हृ॒दयं॑ यू॒पः का॒म आ॒ज्यं
म॒न्युः प॒शु-स्त॑पोऽग्नि॒र् दमः॑ श॒मयि॑ता दक्षि॒णा-वा॒ग्धोता॑ प्रा॒ण
उद्गा॑ता चक्षु॒रध्व॑र्युर् मनो॑ ब्र॒ह्मा श्रो॑त्रम॒ग्नीद्,

याव॑ध्रिय॑ते सा दी॒क्षा यद॑श्च॒जाति॑ तद्ध॒विर् यत्पि॑बति तदस्य सोम॒पानं॑
 य॑द॒रम॑ते तदु॒पस॑दो यथ् सञ्च॑र-त्यु॒पवि॑श-त्यु॒त्तिष्ठ॑ते च स प्र॑व॒र्ग्यो
 यन्मु॒खं तदा॑हवनीयो या व्या॒हृति॑-राहु॒तिर् यद॑स्य वि॒ज्ञानं॑ तज्जु॒होति॑
 यथ्सा॒यं प्रा॑तर॒त्ति तथ्स॑मि॒धं य॑त्प्रा॒तर् म॒द्ध्यन्दि॑नꣳ सा॒यं च॒ तानि॑
 स॒र्व॒ना॒नि

ये अ॒होरा॒त्रे ते द॑र्शपूर्णमासौ येऽर्द्ध॒मासाश्च॑ मा॒साश्च॑ ते
 चातु॑र्मास्यानि य ऋ॒तव॑स्ते पशु॒बन्धा॑ ये सँव॑त्सराश्च परि॒वत्स॑राश्च
 तेऽह॑र्गणाः सर्व॒वेद॑सं वा ए॒तथ् स॒त्रं य॑न्म॒रणं तद॑वभृथ
 ए॒तद्वै ज॑राम॒र्य-म॑ग्निहो॒त्रꣳ स॒त्रं य॑ एवं वि॒द्वा-नु॑द॒गय॑ने प्र॒मीय॑ते
 दे॒वाना॑मे॒व म॑हि॒मानं॑ ग॒त्वा ऽऽदि॑त्यस्य सा॒युज्यं॑
 गच्छ॑त्यथ यो दक्षि॒णे प्र॑मीयते पि॒तृणा॑-मे॒व म॑हि॒मानं॑ ग॒त्वा च॑न्द्रम॒सः
 सा॒युज्यꣳ स॒लो॒कता॑-मा॒प्नोत्ये॒तौ वै सू॒र्या च॑न्द्रम॒सोर् म॑हि॒मानौ॑
 ब्रा॒ह्म॒णो वि॒द्वा-न॑भिजयति तस्मा॑द् ब्रा॒ह्म॒णो म॑हि॒मान॑मा॒प्नोति॑ तस्मा॑द्
 ब्रा॒ह्म॒णो म॑हि॒मान॑-मित्यु॒पनि॑षत् ॥ 101 (1)

स॒ह ना॑ ववतु । स॒ह नौ॑ भुनक्तु । स॒ह वी॒र्यं॑ करवावहै ।

ते॒ज॒स्विना॒ वधी॑तमस्तु॒ मा वि॑द्विषावहै ॥

ओं शान्तिः॒ शान्तिः॒ शान्तिः॑ ॥

इति॑ महानारायणोपनिषत् समाप्ता

Prapaataka Korvai with starting Padams of 1 to 80 Anuvaakams :-

(अ॒म्भ॒स्यै॒क॒प॒ञ्चा॒श॒च्छ॒तं - जा॒त॒वे॒द॒से॒ च॒तु॒र्द॒श - भू॒र॒न्नं -
 भू॒र॒ग्नये॒ - भू॒र॒ग्नये॒ चै॒क॒मे॒कं - पा॒हि पा॒हि च॒त्वा॒रि च॒त्वा॒रि -
 य॒श्छ॒न्द॒सां द्वे - न॒मो ब्र॒ह्म॒णे - ऋ॒तं त॒पो - य॒था वृ॒क्ष॒स्यै॒क॒ मे॒क
 - म॒णो॒रणी॒या ऽ श्रु॒तुस्त्रि॒ंश॒त् - स॒हस्र॑शी॒ष ऽ षड्वि॑ं॒शति॒ -
 रा॒दि॒त्यो वा ए॒ष - आ॒दि॒त्यो वै ते॒ज ए॒क॒मे॒कं - नि॒ध॒न॒प॒तये॒
 त्रयो॑वि॒ंश॒तिः - स॒द्यो जा॒तं त्री॒णि - वा॒म॒दे॒वायै॒क - म॒घो॒रे॒भ्य -
 स्त॒त्पु॒रुषा॒य द्वे द्वे - ई॒शा॒नो - न॒मो हि॒र॒ण्य॒बा॒हव॒ ए॒क॒मे॒क - मृ॒त ऽ
 स॒त्यं द्वे - स॒र्वो वै च॒त्वा॒रि - क॒द्रु॒द्रा॒य त्री॒णि - य॒स्य वै क॒ङ्क॒ती
 - कृ॒णु॒ष्व पा॒जो - ऽदि॒ति - रा॒पो वा इ॒द ऽ स॒र्व मे॒क॒मे॒क - मा॒पः
 पु॒न॒न्तु च॒त्वा - र्य॒ग्निश्च॒ - सूर्य॑श्च॒ न॒व - न॒वो॒मि॒ति च॒त्वा -
 र्या॒या॒तु प॒ञ्चौ - जो॒ऽसि॒ द॒शो - त॒मे च॒त्वा॒रि - घृ॒णि॒स्त्री॒णि -
 ब्र॒ह्म॒मे॒तु मां या॒स्ते ब्र॒ह्म॒ह॒त्यां द्वा॒द॒श - ब्र॒ह्म मे॒धया॑ऽद्या न इ॒मं
 भ्रू॒ण॒ह॒त्यां - ब्र॒ह्म मे॒धवा॑ ब्र॒ह्मा दे॒वाना॑मि॒दं वी॒र॒ह॒त्यामे॒कान्न॑ वि॒ंश॒ति
 रे॒कान्न॑वि॒ंश॒तिर् - मे॒धा दे॒वी - मे॒धां म॒ इन्द्र॑श्च॒त्वा॒रि च॒त्वा॒र्या -
 मां मे॒धा द्वे - म॒यि मे॒धा मे॒क - म॒पै॒तु - प॒रं - वा॒तं प्रा॒ण - म॒मु॒त्र

भूयाद् - ध्रि॑रि॒ - श॒ल्कै॑र॒ग्निं - मा छि॑दो मृत्यो - मा नो
 महान्तं॑ - मान॑स्तोके - प्रजा॑पते - स्व॑स्तिदा - त्र्य॑म्बकं - ये ते
 सह॑स्रं द्वे द्वे - मृत्य॑वे स्वा॒हैकं॑ - दे॒वकृ॑त॒स्यैका॑दश - यद्वो दे॒वाः
 - कामो॑ऽकार्षीन् - मन्यु॑रकार्षीद् द्वे द्वे - तिला॑ञ्जुहोमि गावः श्रियं
 प्रजाः पञ्च॑ - तिलाः कृ॑ष्णश्चो॒रस्य॑ श्रीः प्र॒ज्ञातु॑ जातवेदः
 सप्त॑ - प्राण॑ वाक् त्वक् छिर॑ उत्तिष्ठ पुरुष॑ पञ्च - पृथि॑वी शब्द
 मनो॑ वाग् व्य॒क्ताऽऽत्माऽन्तरा॑त्मा परमा॒त्मा मे॑ क्षु॒धेऽन्न॑मय
 पञ्च॑दशा - ग्नये॑ स्वा॒हैक॑चत्वारि॒श - दो॑न्तद् ब्र॒ह्म नव॑ -
 श्र॒द्धायां॑ प्रा॒णे नि॒विष्ट॑ श्रु॒तुर्वि॑शतिः - श्र॒द्धायां॑ दशा - ङ्गु॑ष्ठ मात्रः
 पुरु॑षो द्वे - वाङ्म॑ आ॒सन्न॑ष्टौ - वयः॑ सु॒पर्णाः - प्रा॒णानां॑ ग्रन्थि॑रसि
 द्वे द्वे - नमो॑ रु॒द्रायै॑कं - त्वम॑ग्ने द्युभिर् द्वे - शि॒वेन॑ मे सन्ति॑ष्ठस्व
 - स॒त्यं - प्रा॒जाप॑त्य - स्तस्यै॑व मे॒क मे॒क म॑शीतिः)

तैत्तिरीय आरण्यकं - महानारायणोपनिषत्- TA- 6

Korvai with starting Padams of 1, 11, 21 Series of Dasinis :-

(अ॒म्भ॒स्य॒पा॒रे - स्व॒स्ति॒ नः॑ - पा॒हि॒ नो॑ अ॒ग्न॒ ए॒क॒या - ऽ॒दि॒त्यो॒ वा
ए॒ष - ऋ॒त॒ꣳ स॒त्य - मो॒ मि॒त्या - मां॑ मे॒धा - मा॒ न॒स्तो॒के -
ति॒ला॒जु॒हो॒मि - श्र॒द्धा॒यां॑ प्रा॒णे नि॒वि॒श्य - तस्यै॒व मे॒को॒त्तर॒श॒तम्)

=====

Details of Dasini&Vaakyams for Prapaatakam6 (TA 6)

	Dasini	Vaakyams
Anuvakam 1	15	151
Anuvakam 2	1	14
Anuvakam 3	1	1
Anuvakam 4	1	1
Anuvakam 5	1	1
Anuvakam 6	1	4
Anuvakam 7	1	4
Anuvakam 8	1	2
Anuvakam 9	1	1
Anuvakam 10	1	1
Anuvakam 11	1	1
Anuvakam 12	3	34
Anuvakam 13	2	26
Anuvakam 14	1	1
Anuvakam 15	1	1
Anuvakam 16	2	23
Anuvakam 17	1	3
Anuvakam 18	1	1
Anuvakam 19	1	2
Anuvakam 20	1	2
Anuvakam 21	1	1
Anuvakam 22	1	1

तैत्तिरीय आरण्यकं – महानारायणोपनिषत्– TA- 6

Anuvakam 23	1	2
Anuvakam 24	1	4
Anuvakam 25	1	3
Anuvakam 26	1	1
Anuvakam 27	1	1
Anuvakam 28	1	1
Anuvakam 29	1	1
Anuvakam 30	1	4
Anuvakam 31	1	9
Anuvakam 32	1	9
Anuvakam 33	1	4
Anuvakam 34	1	5
Anuvakam 35	1	10
Anuvakam 36	1	4
Anuvakam 37	1	3
Anuvakam 38	1	12
Anuvakam 39	1	19
Anuvakam 40	1	19
Anuvakam 41	1	4
Anuvakam 42	1	4
Anuvakam 43	1	2
Anuvakam 44	1	1
Anuvakam 45	1	2
Anuvakam 46	1	2

Anuvakam 47	1	2
Anuvakam 48	1	2
Anuvakam 49	1	2
Anuvakam 50	1	2
Anuvakam 51	1	2
Anuvakam 52	1	2
Anuvakam 53	1	2
Anuvakam 54	1	2
Anuvakam 55	1	2
Anuvakam 56	1	2
Anuvakam 57	1	2
Anuvakam 58	1	1
Anuvakam 59	1	11
Anuvakam 60	1	2
Anuvakam 61	1	2
Anuvakam 62	1	2
Anuvakam 63	1	5
Anuvakam 64	1	7
Anuvakam 65	1	5
Anuvakam 66	1	15
Anuvakam 67	4	41
Anuvakam 68	1	9
Anuvakam 69	1	24
Anuvakam 70	1	10

तैत्तिरीय आरण्यकं – महानारायणोपनिषत्– TA- 6

Anuvakam 71	1	2
Anuvakam 72	1	8
Anuvakam 73	1	2
Anuvakam 74	1	2
Anuvakam 75	1	1
Anuvakam 76	1	2
Anuvakam 77	1	1
Anuvakam 78	1	1
Anuvakam 79	1	1
Anuvakam 80	1	1
Total →	101	579